

麗東

體古

金

文

膏

(三)

存



麗體金膏

三

馬俊良輯

編主五雲王  
編初成集書叢  
種一他其及膏金體麗  
冊 三

中華民國二十六年六月初版

發行人

王雲五  
上海河南路

印刷所

商務印書館  
上海河南路

發行所

商務印書館  
上海及各埠

(本書校對者 王養吾 林懷民 秦泉聲 吳麟璋  
蔡仲宣 丁心田 張叔介)

\* 五七九九

大

# 國朝麗體金膏卷七

## 拜颺集

唐

上文選注表

爲汝南公華州賀赦表

爲京兆公陝州賀南郊赦表

宋

賀登極表

賀登極表

賀登極表

賀聖節表

賀元會表

賀皇帝御福寧殿表

李 濬

李商隱

李商隱

范致虛

許 開

陳者卿

方 岳

秦 觀

李 劉

賀車駕幸祕書省表

呂祖謙

賀車駕幸太學表

石忬

車駕親征起居表

汪藻

賀誅吳曦表

危昭德

代宣司賀復泗州表

應松湖

代宰相賀正旦雪表

洪适

賀雪表

呂祖謙

代宰相賀雪表

楊萬里

賀雪表

黃疇若

賀河清表

趙鼎臣

徐州賀河平表

蘇軾

賀獄空表

趙鼎臣

和議成賀表

岳飛

賀光堯皇帝遜位表

馮時行

正日遙賀太上皇表

賀太上皇壽七十表

重華宮會慶節賀表

會慶節賀壽皇表

車駕巡幸起居太上皇表

重華宮上尊號賀皇帝表

賀皇帝慶皇太后八十表

又

代進光宗御集表

國史院進三朝正史帝紀表

代進重修七司令表

進大學衍義表

乞校正陸贄奏議上進劄子

進兩制三館牡丹歌詩狀

汪藻

孫養晦

周必大

陸游

汪藻

許開

洪适

洪适

王子俊

洪邁

王子俊

真德秀

蘇軾

晏殊

進先文定公文集表

胡寅

謝兼侍讀表

蘇軾

謝侍講兼脩國史表

洪邁

謝宣召入翰林狀

歐陽修

謝宣召入院表

真德秀

謝知制誥表

歐陽修

謝除中書舍人表

蘇轍

謝禮部尙書兼翰林院學士表

周必大

謝除禮部侍郎兼直院兼侍讀表

真德秀

密州謝上表

蘇軾

湖州謝上表

蘇軾

到黃州謝表

蘇軾

謝量移汝州表

蘇軾

到昌化軍謝表

蘇軾

謝南郊恩加封表

汪藻

謝賜御草書趙嘏南亭詩表

王禹偁

謝賜御書孟子表

范端臣

謝賜御書張九齡千秋金鑑錄故事表

眞德秀

謝賜衣帶表

楊萬里

謝賜對衣金帶馬狀

蘇軾

又

蘇軾

謝賜對衣金帶鞍馬表

張守

謝賜銀合臘藥表

周必大

又

周必大

謝賜柑表

金使闕名

謝致仕表

歐陽修

亳州乞致仕第二表

歐陽修

亳州乞致仕第四表

歐陽修



乞常州居住表

蘇軾

唐李善上文選註表

舊有俞犀月註。按犀月名場。江南吳江人。○舊唐書。李善。江都人。方雅清勁。明察中。累補太子內率府錄事參軍。崇賢館直學士。兼沛王侍讀。註文選六十卷。表上之。賜

絹百二十四匹。詔藏于祕閣。除潞王府記室參軍。轉祕書郎。乾封中。出為經城令。坐與賀蘭敏之周密。配流姚州。後遇赦得還。以教授為業。弟子多自遠而至。又撰漢書辨惑三十卷。載初元年卒。新唐書李憲傳。父善有雅行。淹貫古今。不能屬辭。故人號書籠。何曰。李善文選。學本於其師曹憲。憲。江都人。隋祕書學士。嘗著廣雅。以昭明文選授同郡魏模。公孫羅江夏李善。於是其學大興。見唐書儒林列傳。

臣善言竊以道光九野。縹景影緯以昭臨。日月之景。○德載八埏。九州之外有八埏。麗山川以錯峙。時。屹。垂象之文斯著。含章之義聿宣。協人靈以取則。基化成而自遠。故義繩之前。飛葛天之浩唱。路史

立貌。俞曰。呂氏春秋。葛天氏之樂。三人操牛尾。投足以歌八闕。媧簧之後。女媧。黃帝臣。揆聲。叢雲之奧詞。俞曰。尚書大傳。舜將禪

帝乃載歌。于是八風循道。卿雲靈聚。步驟分途。帝驟。三王馳。五霸驚。星躔殊建。球鐘愈暢。球。玉。舞

詠方滋。楚國詞人。御蘭芬於絕代。漢朝才子。綜繁榮。悅於遙年之學者。非獨為之華藻也。又從而繼其繁。言用

文飾於不必。虛元流正始之音。此正始與上篇正始之道著不同。衛玠別傳。玠至武昌。見王敦。敦頗謂僚屬曰。昔年輔

用之地。○虛元。謂以無為宗。老莊之屬。正始。魏曹芳年號。時何晏善談老莊。天下翕然宗之。嗣吐金聲于中朝。此子今復玉振于江表。徵言之

緒。絕而復續。不悟永嘉之中。復障正始之音。氣質馳建安之體。沈約宋書。子建仲宣以氣質。為體。建安。漢獻帝年號。長離北度。何曰。潘

附陸機詩云。婉婉長離。凌江而翔。長離入洛。春。騰雅詠於圭陰。俞曰。周禮大司徒以土圭之法。測土深。正日景。射隴生。長離。鳳也。北度。謂吳亡北度云誰。○騰雅詠於圭陰。以求地中。圭陰註。土圭長尺五寸。夏至日立八尺

之表。共景止與土圭等。謂之地中。測景於地。故曰圭陰。蓋洛陽為天地之中。化龍東鶩。煽扇風流於江左。晉陽秋。

童謠曰。五馬浮渡江。一馬化為龍。時永嘉末。大亂。唯琅琊西陽汝南南頓彭城五王渡江而東。後。爰逮有梁。宏材彌

劭昭明太子業膺守器。譽貞問寢。居肅成而講藝。魏書。文帝初在東宮。集諸儒於肅成門內。議論大議。侃侃無倦。開博望以招賢。漢武帝為太子。

瀾。搜徑寸之寶。故撰斯一集。名曰文選。後進英髦。咸資準的。伏惟陛下。經緯成德。文思垂風。則大居尊耀。俞曰。漢詩外傳。良玉度尺。雖有十仞之土。不能掩其光。楚望長

三辰之珠璧。希聲應物。宜六代之雲英。孰可撮壤崇山。導涓宗海。臣蓬衡最品。樗散陋姿。汾河委筴。二音。嶺嶺。

夙非成誦。按。漢武帝過河東。亡書十三篋。張安世詎出。不遺一字。不曰河東而曰分河。與下崇山取對成偶耳。成誦者。穎悟人書過目不忘。如已誦過。崇山墜簡。未議澄心。愈曰。崇

義。晉嵩山下有古簡一枚。截蠟蚪書兩行。張華以問東竹。竹曰。此漢明帝負節陵策文。驗之果然。握玩斯文。載移涼燠。有欣永日。實味通津。故勉十舍之勞。三

里為一舍。淮南子。夫駢騶千里。一日可通。駕馬十舍。句必及之。寄三餘之暇。而義自見。從學者云。苦竭無日。遇日。以三餘。冬者歲之餘。兩者

晴之餘。夜。弋釣書部。願言注緝。合成六十卷。殺青甫就。殺青。以火炙青竹而為簡。輕用上聞。享帚自珍。典論。里語云。家

有敝帚。享之千金。言藏之則為敝帚。獻之於人。則自家珍惜如千金然。不忍舍也。緘石知謬。緘石見應璩百一詩註。敢有隳於廣內。庶無遺於小說。謹詣闕奉進。

伏願鴻慈。曲垂照覽。謹言。顯慶三年九月日上表。舊唐書。高宗紀。永徽七年正月。改元為顯慶。六臣表。十七日。

方伯海曰。按表者。表白其事。魏晉而上。皆用散行。其四六駢體。至六朝始有。然亦分二種。有指陳事理者。有陳謝慶賀者。陳謝慶賀。唐宋而後。概用駢體。而指陳事理。亦多用散行。以不如是。則無以反覆事理而曲暢之也。即駢體中。亦要依類切題。不特原起正位處當切。即頌聖自謙。亦要比事屬詞。六朝所以失之繁蕪。由於只取富麗。浮夸不實。銘誌碑碣。按之本人。多不相似。處處可通。故不足貴。此表截截周到。字字雅切。自未有文字。說到既有文字。見累朝體製不同。宗匠各擅。則昭明茲選。誠有益藝林。己之註選。非徒勞翰墨矣。其括各家處。品昭明處。頌聖自謙處。不落膚泛穢雜。筆墨當遠駕六朝之上。

為汝南公華州賀。當脫南。敕表。舊唐書。周煒傳。煒字德升。汝南人。長慶二年擢進士第。開成四年拜中書舍人。武宗即位。出為華州刺史。鎮國軍滿關防禦等使。後至大中時。封汝南男。新

字。其括各家處。品昭明處。頌聖自謙處。不落膚泛穢雜。筆墨當遠駕六朝之上。

書傳。武宗即位。以疾改工部侍郎。出為華州刺史。按舊書紀陳夷行傳。開成五年七月。以檢校禮部尚書華州刺史召入。復同平章事。則周暉代陳刺華。亦在此際也。舊書武宗紀。會昌元年正月壬寅朔。庚戌。有事於南郊。大赦改元。御丹鳳樓。大赦改元。新書紀。正月己卯。朝獻太清宮。庚辰。朝享太廟。辛巳。有事於南郊。大赦改元。按太平御覽引此作庚戌。同舊書。通鑑引此作辛巳。同新書。新書紀事而不紀朔。舊書正月壬寅朔。二月乃又書壬寅。今以本集祭文。是年四月辛丑朔。舊紀十一月丁酉朔。通鑑閏月十月。舊紀誤作兩十月。又舊紀開成五年正月戊寅朔。會昌二年正月丙申朔。合而推之。則舊紀二月壬寅不誤。正月寅誤。當作壬申或癸酉朔。其九日或庚辰或辛巳。則一一畢符也。此為無益之考核耳。又按唐時郊天。頗不專用辛日。如大中元年正月。舊紀戊申有事郊廟。新紀作甲寅。要皆非辛也。此兩表云卜上辛。謂用典也可。謂適逢辛也可。其為九日必然也。

唐李商隱義山

臣某言伏奉正月九日制書南郊禮畢改元為某大赦天下者。王應麟玉海。秦并諸侯曰。大赦天下。由漢以來。或即位建儲。改元立后。皆有大赦。遂為常制。

奉郊禮以定天位。周禮。大宗伯以禮祀昊天上帝。周語。精意以享。新歷象以授人時。書。歷象日月星。乾健離

明震動兌悅。見易象。踐行喙息。漢書匈奴傳。踐行喙息。喚動之類。師占曰。踐。罔不慶幸。臣某中賀。臣聞欽作。

非。昊天而旅上帝者。書。欽若昊天。周禮。掌次大。聖王一人。之重事。覃殊休而發大號者。易。渙汗。哲后

之洪猷。故必致四圭以達誠。周禮。典瑞。四圭有邸以祀。制六器而申敬。周禮。大宗伯。以玉作。將崇嚴配。

孝經。嚴父莫。必在元句。禮記。孟春之月。天子乃以元日祈穀于上帝。注曰。謂以上辛郊祭天。先之以蒼璧駢牲。禮

大宗伯。以蒼璧禮天。禮記郊特性。重之以雲門大呂。周禮大司樂。乃奏黃鐘。歌。然後王猶有闕於薦敬。禮記

也。敬以欲。爽彼告虔。魏志。高堂隆疏曰。所以。周官三代之文。周官即周禮。三代之制。絕而不續。漢氏萬靈之

位。史記封禪書。公孫卿曰。黃帝接萬靈明廷。明廷者甘泉也。又天子遂郊雍。幸甘泉。令祀官具太一詞壇。十一日辛巳。朔旦冬至。味爽。天子始郊。拜太一如雍郊禮。漢書郊祀志。甘泉宮中為臺室。畫天地泰一諸鬼神。而置祭具。以致

天神。按此萬靈之位。似指秦時甘泉。而祠祀極多。備見郊祀志。失而莫尋。豈若皇帝陛下以大道遼羣生。以至公臨寶祚。上苞元象。下櫛

泉。而祠祀極多。備見郊祀志。失而莫尋。豈若皇帝陛下以大道遼羣生。以至公臨寶祚。上苞元象。下櫛

同皇祇黜幽陟明書三考。與廢繼絕靈芝甘露鄙之而不告史官漢書武帝紀元封二年甘泉宮內中產芝

年。甘露降未央宮。元康四年。金芝九莖。產函德殿銅池中。神爵二年。鳳皇甘露降集京師。赤鴈白麟。陋之而不編瑞牒漢書武帝紀太始三年行幸東海

幸雍。祀五時。獲白麟。作白麟之歌。班固兩都賦序。武宣之世。衆庶說豫。福應尤盛。白麟赤雁。芝房寶鼎之歌。薦於郊廟。神爵五鳳。甘露黃龍之瑞。以為年紀。然後因孟月一作春。卜一作

上辛。禮記。郊之用辛也。周之始郊日以至。春秋穀梁傳。以十二月下辛。卜正月上辛祭。率於國南。周制祈穀壇名泰壇。在國南五十里。式是歲首。且天以

陛下為子。故必饗明誠人。以陛下為天。故必流睿澤。踰千越萬按即超越前古之意。舊引漢書郊祀志。邁五

登三舊書司馬相如傳。何則。取致集作。直言之科漢書武帝紀建元元年詔舉賢良。則聽輿論者不足算左傳

與人誦。設宥過之令書宥過無大。則除鄉議者未可儔左傳。鄭人游于鄉校。以論執政。然明謂于產毀

以議執政之善否。其所善者。吾則行之。其所惡者。吾則改之。是吾師也。若之何毀之。延賞推恩書賞延于世。按推恩是汎語。非專用漢書

捍患之士。能禦大患則祀之。減租退責漢書惠帝紀帝即位。減田租。復十五稅一。退責即已責。左

火耕水耨之人漢書武帝紀詔曰。江南之地。火耕水耨。應劭曰。燒草下水種稻。草與稻。養庶老。頒淖糜暖帛

之資禮記月令仲秋養衰老。授几杖。行糜粥飲食。王制。有虞氏養國老於上。走羣望。潔剝牲瘞幣之禮左傳

不覲者復覲。古不開者復開。萬蟄蘇而六幽盡開禮記樂記曰。蟄蟲昭。五刃藏而九土咸關齊語。定三革。隱五刃。注曰。

定、奠也。隱、藏也。三革、甲冑也。五刃、刀劍矛戟矢也。魯語。共工氏子曰后土。能平九土。三告示

臣當時集軍州官吏等丁寧告示訖。漢書谷永傳。以丁寧禮下。師古曰。丁寧禮再

也。况臣嘗備論思。獲叨侍從。兩都賦序。武宣之世。言語侍從之臣。若司馬相如、虞邱壽王、東方朔、枚臯、王褒、劉向之屬。朝夕論思。日月獻納。當時仙禁。慚視草

以無能。

漢書淮南王傳。武帝每為報書及賜。常召司馬相如等視草。乃遣。舊書傳。堉能為古文。有史才。文宗重之。歷集賢學士。起居舍人。知制誥。充翰林學士。拜中書舍人。此日秦壇望給薪

而靡及。禮記祭法。燔柴於秦壇。祭天也。月令。李冬之月。命四監收秩薪柴。以其郊廟。及百祀之薪燎。周禮。委人以式法共祭祀之薪蒸木材。徘徊旬服。跼蹐關城。史記。呂產入未

入。徘徊往來。詩。謂天蓋高。不敢不局。謂地蓋厚。不敢不踣。雖有慶於文明。竟無階於奔走。詩。武成。祀于周廟。邦甸侯衛駿奔。走。執豆蓬。詩。駿奔走在廟。司馬談闕

陪盛禮。沒齒難忘。史記自序。是歲。天子始建漢家之封。而太史公留滯周南。不得與從事。故發憤且卒。蕭望之願立本朝。馳魂莫及。漢書蕭望之傳。望之

本朝。遠為郡守。內不自得。無任抃舞結戀之至。

### 為京兆公陝州賀南郊赦表

按此即上篇之事也。徐氏以本集代謝相國京兆公諸啓。獻相國京兆公啓。皆為杜餘初亦從之而疑之。今而實知其謬也。通鑑。會昌元年三月。武宗將遣使誅楊嗣復等。戶部尚書杜悰奔馬見

德裕。是何嘗有出外之蹟哉。舊書傳。章溫。京兆人。文宗時為尚書左丞。出為陝虢觀察使。武宗即位。李德裕用事。召拜吏部侍郎。今據此文。蓋溫於武宗初出為陝虢。傳文小舛耳。章自漢扶陽侯徒京兆杜陵。故後世皆稱京兆城南章杜。何可專屬杜哉。獻相國京兆公啓。亦非杜也。又按。此題與獻相國京兆公與尚書渤海公。及詩之寄興元渤海尚書。書法本自分別。不細心考索。易致相混耳。舊書志。陝州屬河南道。陝虢觀察使。治陝州。

### 唐李商隱義山

臣某言。臣伏奉正月九日制書。郊禋禮畢。改元為某人。赦天下者。既事虞郊。書舜典。肆類于上帝。禮記祭法。有虞氏禘黃帝而郊。魯

復新堯歷。天潢瀉潤。史記天官書。漢者金之散氣。其本曰水。絕漢曰天潢。後漢書張衡傳。乘天潢之汎汎兮。浮雲漢之湯湯。日觀揚暉。見為安平公表。普天率土。罔不

慶幸。臣某中賀。臣聞君人之孝。莫大於尊祖。詩序。生民。曾祖也。后稷生于姜嫄。文武之功。起于后稷。故推以配天焉。王者之敬。孰踰於事天。

固一作故。必用因高之儀。禮記禮器。爲高必因邱陵。注。謂冬至祭天子園邱之上也。申嚴配之禮。見上。表。百神字。集有攸。序萬靈昭。集有蘇。字。乃可。

覃殊恩。渙大號。禮成而德備。惠敷而慶宏。然而秦尙武功。戰國策。魯仲連曰。彼秦者。喪禮義而尙首功之國也。先祈禳之事。漢書郊

秦并天下。令祠官各以歲時奉祀。唯雍四時。上帝爲尊。又曰。祝官有祕祝。即有災祥。輒祝祠移過于下。故柴燎蕭薌未必饗也。郊特性。既奠。然後炳蕭合稷薌。

漢稱文物。左傳。文物以紀之。聲名以發之。按漢時稽古禮文之事。武帝始作。備詳漢書紀贊。云稱文物。謂此也。故下云重神仙。重神仙之道。漢書紀。文帝十五年。上幸雍。始郊見五帝。武帝元鼎

五年。立泰畤于甘泉。天子親郊見。餘詳上篇。武帝好神仙。詳史記漢書。故雲門太簇未必和。周禮。大司樂。圍鍾爲宮。黃鍾爲角。太簇爲徵。姑洗爲羽。雲門之舞。冬日至於地上之園邱奏之。漢書禮樂志。武帝定郊祀之禮。乃立樂府。造爲詩賦。略論律呂。以合八音之調。作十九章之歌。以正月上辛。用事甘泉園邱。使童男女七十人俱歌。

既不講於禮官。終致譏於儒者。伏惟皇帝陛下。與春生育。並日照臨。究三代之質文。酌百王之損益。定午位。卜上辛。潔齊之誠。易。齊也者。言萬物之潔齊也。先

掃除而遐達。禮記。至敬不禮。掃地而祭。掃地而祭。孝思之志。協氣臭以升聞。禮記。至敬不饗味而貴氣。臭也。香。元德升聞。然後推作解之恩。易。雷雨作。君子以赦過宥罪。書。舊染汙俗。設科以招諫諍。新書選舉志。制舉有賢良。有過以務哀矜。書。皇帝哀矜。庶戮之不辜。已

責既恤於三農。周禮。三農。九文。帝紀。有司請八十以上。月賜米肉酒。九錄勳無遺於十代。左傳。范宣子因叔向。祁奚曰。社稷之固也。猶將十世有之。以勳能者。以勳能者。頒粟帛而養耆老。漢

文。帝紀。有司請八十以上。月賜米肉酒。九錄勳無遺於十代。左傳。范宣子因叔向。祁奚曰。社稷之固也。猶將十世有之。以勳能者。以勳能者。頒粟帛而養耆老。漢

軍州官吏丁寔告示訖。況臣嘗奉恩光。叨居華顯。當太史撰日之際。周禮。太史。大祭祀與執事。卜日。文選。曹大家東征賦。時孟春之吉日兮。撰良辰

而將行。善曰。禮記。猶立漢廷。漢書陸賈傳。賈以此遊漢庭公卿間。及宗伯相儀之時。周禮。大宗伯。凡祀大神。享人

見。漢書陽陳情表。按於開成五年。歲暮出而至陝。舊紀不書也。見。漢書百官公卿表。郡守秩二千石。已辭魏闕。

見。漢書陽陳情表。按於開成五年。歲暮出而至陝。舊紀不書也。見。漢書百官公卿表。郡守秩二千石。已辭魏闕。

見。漢書陽陳情表。按於開成五年。歲暮出而至陝。舊紀不書也。見。漢書百官公卿表。郡守秩二千石。已辭魏闕。

郡公啓徒深傾藿之誠曹植表葵藿之傾葉太陽雖不實積懸瓠英華注疑作瓠之歎詩瓠有苦葉傳曰瓠謂之

瓜得繫一處者不食故也吾自食物當東西南北不得如不食之物繫滯一處瓠按不必疑瓠論語詩瓠瓠也瓠按古今注瓠有柄曰懸瓠此則用論語以歎羈滯卽他篇羨海槎不繫之意召公邑內敢思棠樹以追蹤詩序美召

公也箋曰召公聽男女之訟不重煩勞百姓止舍小棠之下而聽斷焉國人思其人敬其樹餘見彭陽遺表尹喜宅中惟望靈符之復出舊書紀天寶元年正月陳

皇帝降見於丹鳳門之通衢告賜靈符在尹喜之故宅上遣使就函谷故關尹喜臺西發得之地理志陝州靈寶縣本桃林縣以搨得寶符改名臣不勝慶幸踴躍之至

宋四六選

賀登極表

范致虛

帝出乎震。夙膺主器之祥。王次於春。遂迓履端之慶。天人協應。夷夏交懽。竊以受命之君。莫大於創業垂統。繼體之主。所貴於持盈守成。念夫致王業之艱難。是知履帝位而中正。爲人上若朽索之馭。措天下如泰山之安。恭惟皇帝陛下。承八聖之丕基。檢千齡之寶運。聰明睿知。得四海之懽心。恭儉孝慈。副萬邦之俟望。故太上欣傳於聖祚。而千官喜戴於堯仁。進當有大之符。入纘無疆之烈。乘乾之健。金行適應於庚申。繼離之明。火德遂迎於丙午。契宋興之首歲。當炎運之昌期。諒天心眷佑之有歸。豈人事謳歌之無證。惟東宮之毓聖德。十有一年。宜南面而朝羣臣。萬有千歲。臣叨陪邇列。阻造天庭。追懷昔玷於周行。每瞻天表。自幸未先於朝露。獲覩龍飛。尙觀新政之行。普慰蒼生之願。

賀登極表

許開

壽皇發號。自託倦勤。睿主膺圖。茲誠善繼。事光今古。慶溢華夷。恭惟皇帝陛下。仁孝稟乎天資。忠厚循乎家法。象符洊震。仰元良者二十年。運偶重離。兼剛柔之六三德。漢承堯而傳歸於子。舜授禹而允執厥中。別殿問安。永具威儀於鳳輦。靈臺偃伯。必加正朔於龍庭。臣逃奉教條。阻趨班列。一道而聖相受。仍際太平。舊邦而命惟新。請賡大雅。

賀登極表

陳耆卿

歷數承堯。裨千歲皇圖之正。謳歌歸舜。煥一時帝位之新。廟社鼎安。寰區泰定。竊以百年南渡。四世中興。繼體守文之功。固永扶於基緒。撥亂反正之略。將寢復於土疆。人未占以有孚。天不言而善應。是生上聖。以闡重明。恭惟陛下。性德清淵。幾神濬哲。韜除外邸。隱然天日之姿。出入內朝。允矣宗祊之望。共識五馬之渡。誰知六龍之潛。迨此承祧。決於與子。合夷夏之無外。度帝王之有真。停歌周宣復古之詩。併擬元結齊天之頌。含齒之衆。跂足以須。臣猥守京畿。欣逢御極。風雲從而萬物覩。已不聳於八垓。日月照而四時行。幸光輝於三輔。

賀聖節表

方岳

惟天數五。正淵猷之孟陬。聞嶽呼三。增泰元之神筴。星樞明潤。海宇清夷。恭惟皇帝陛下。受命溥將。躋民仁壽。華夏蠻貊。罔不率登。茲太平國家閒暇。及是時所。其無逸。祥開甲觀。春在寅塔。臣幸假熊馮。嘗陪獻



舞河千里一曲。雖遠京師。亥二首六身。但忻歲紀。

賀元會表

秦觀

十三月爲正。旣前稽於夏道。二千石上壽。仍參承於漢儀。盛且載逢。彝章具舉。伏惟皇帝陛下。財成天地。參並神明。命羲和之二官。謹春秋之五始。調和元氣。撫御中區。肆屬春王之朝。肇修元會之禮。雞人呼日。庭燎有光。外則虎賁羽林。嚴宿衛之列。內則謁者御史。肅班行之容。漏未盡而車輅陳。蹕旣鳴而鼓鐘作。應龍高舉。雲氣畢從。北極上臨。星宿咸拱。受四海之圖籍。拜萬國之衣冠。歲月日時。於焉先正。聲明文物。粲爾可觀。邁康王艷宮之朝。揜高帝長樂之事。藹頌聲而並作。鬱協氣以橫流。臣比遠天光。遽更年籥。職拘藩國。莫瞻龍袞之升。心折宸居。但想獸樽之列。

賀皇帝御福寧殿表

李劉

祕殿鼎新。昭鴻名而日揭。宸居離麗。肅龍衛以天臨。風來南面之薰。星拱北辰之所。恭惟陛下。體元居正。闔大宅中。福庶民以是訓之彝。寧萬國以惟和之政。盡力致孝。旣卑夏禹之宮。修政禳災。復考宣王之室。棟取諸壯。蔀轉而豐。鶯聲旣便於觀旂。鶴駕仍通於問寢。誕敷文德。聿觀舞羽于兩階。載纘武功。式燕躋堂之萬壽。臣攝磨黔鄙。馳夢清都。四海爲家。更願綢繆於牖戶。萬民安宅。益堅壯麗之山河。

賀車駕幸祕書省表

呂祖謙

東觀書林久。後漢儀之觀。西崑冊府載。瞻周馭之臨。嗣三紀之閎模。軼百王之盛節。竊以斯文崇替。與世  
降升。自我祖宗。闢載籍萃藏之地。於時典冊踵乘。輿游幸之書。從容箴誨之求。廣大峻良之聚。炎圖再造。  
華省一新。爰親御於右文。用仰繩於前武。重明善繼。太極丕承。乙夜牘陳。念初載網羅之不易。昕朝班入。  
思中興儲養之有原。迺展列聖圖書之奧。帝暉下矚。光汗牛克棟之藏。天藻高垂。跨  
駟馬柏梁之詠。湛露示醇醲之惠。承雲宣純繹之音。一日萬幾。曾靡齋居之暇。九流七略。獨煩清蹕之留。  
蓋以恢稽古尚德之風。夫豈爲飾治樂成之舉。聲明布濩。慶賜汪洋。恭惟皇帝陛下。秩序邦經。裁成王度。  
多聞將求建事。旣留意於簡編。大烹所以養賢。復均盼於肴醑。士心興起。雅道流行。臣等服在具條。身逢  
昌會。第從臣之頌。敢揚厲於鴻休。近天子之光。請具宜於德意。

賀車駕幸太學表

石 恣

三千璧水。教自國中。萬里旒旌。來從天上。升階奠爵。而蒐舉墜典。橫經賜坐。以光輝諸生。自然草靡而風  
從。孰不鳶飛而魚躍。竊以增員廣舍。自漢而下。莫如唐。養老乞言。由堯以是傳之舜。削畫餅虛名之科舉。  
惠。贏糧往學之衣冠。在太平時。皆盛德事。前古蓋嘗有意。卒無成功。元豐未暇盡行。留待今日。恭惟皇帝  
陛下。與天無極。如日之升。謂命鄉論。秀告於王。而化民成俗。必由學。夙嚴葆衛。祇謁儒宮。有司洒道。以清  
塵。觀者駢肩而累足。雲開東幄。降黃屋以親臨。鷺集西廳。望翠華而再拜。士氣鼓翮。歡心湧泉。豈特夏曰

校而周曰庠。矢其文德。將使戎在西而狄在北。懷我好音。臣日觀天書。心存魏闕。起太史滯留之嘆。嘉會難逢。獻周王壽考之詩。適人未出。

車駕親征起居表

汪藻

萬旅戒嚴。六韋巡狩。法成周之時邁。張大漢之天聲。恭惟皇帝陛下。誠貫神明。資兼智勇。合羣英之策慮。興中否之基圖。念問安猶隔於雞鳴。豈撥亂得辭于馬上。姑從簡約。用示憂勤。臣方遠闕庭。莫共牧圉。神戈所指。方令裴度以視師。清蹕之行。將獲呂嘉而名縣。

賀誅吳曦表

危昭德

河山有誓。敢爾負恩。天地不容。竟茲授首。神人憤洩。海宇懽同。恭惟皇帝。紹開中興。布宣聖武。三軍叶力。事方急於規恢。一夫當關。志乃謀於竊據。公連異類。欲悖太陽。以所守非親。而化爲豺狼。謂無天道。見無禮于君。而誅如鳥雀。寧變人心。不勞尺兵。遂膏齊鉞。平劉闢於蜀。本元和聖德之明。除子璋於綿。豈成都猛將之力。臣叨聯近屬。假守神泉。自聞露布之馳。不知履齒之折。大開明堂之朝賀。深荷清廟之宣揚。

代宣司賀復泗州表

應松湖

十乘啓行。誕播順天之罰。一城得雋。首歸輿地之圖。壯士氣於前茅。憺皇靈於破竹。山河開闢。夷夏驩呼。竊惟大義之鼓行。尤貴先聲之響應。漢數百戰。由下沛以迎降。湯十一征。蓋自葛而始載。矧泗水之名郡。

本都梁之故城。雞犬相聞。久渴旱霓之望。豺狼肆噬。可稽時雨之師。肆舉幟以先登。果倒戈而效順。民皆按堵。市不易廛。破淮北之藩籬。諸道並進。扼山東之門戶。萬里長驅。陛下默運神機。於昭聖武。過師枕席之上。救民水火之中。曰。後。後來蘇。爭持牛酒。有不戰。戰必勝。行洗甲兵。臣肅奉廟謨。董司戎律。鋪淮瀆而馘醜虜。已觀因壘之降。伐獫狁以奏虜公。竚見犁庭之舉。

代宰相賀正旦雪表

洪适

三微更始。正王道之大端。六出飛花。兆年豐之嘉慶。自近及遠。式舞且歌。竊以葭律移灰。方陬月棣通之際。椒花獻頌。正鴻禧萃聚之時。蓋聖人之德無加。則天瑞應誠而至。葵心向日。方瞻鳳歷之頌。柳絮因風。已發兔園之詠。雜軒墀之玉砌。成宮闕之瑤臺。實一人有慶之符。示百穀用成之應。良史直筆。已書尺地之珍。太師陳詩。行播千倉之什。茲蓋恭遇皇帝陛下。履端於始。與物爲春。惟盛德上合於天。故圓穹不愛其道。既頌聲之並作。致協氣以橫流。七政齊於璿璣。有台璧連珠之瑞。四時和爲玉燭。無鳴條破塊之灾。故茲五穀之精。降此一歲之始。臣濫司台柄。獲覩休祥。燮理陰陽。大懼絲豪之無補。勤勞稼穡。行觀廩庾。以皆盈。仰望龍顏。徒深鼇抃。

賀雪表

呂祖謙

蟻漫嬋娟。穆若清都之邃。聯翩飛洒。霏然豐樂之祥。璀璨宸居。昭融休氣。恭惟太上皇帝陛下。默調玉燭。

高抵珍臺。成性存存。雖獨觀於虛白。爲衆父父。未庸釋於黎黔。顧圭璧之錯陳。睽倉箱之載懌。臣逖居下土。絕跋寥天。游藐姑之山。旣瞻冰雪。占曾孫之稼。豫慶茨梁。

代宰相賀雪表

楊萬里

神功所格。冬大雪以應期。天意謂何。年屢豐而表瑞。吉之先見。序則不愆。恭惟皇帝陛下。乾以君之。聖之時者。日月所會。臨地統於三正。造化爲工。凋天葩之六出。知麥禾之有望。舉稚蠶以載欣。臣遭世泰。和罔功。變理驗時。寒之若端。自聖謀懷履薄之如。敢忘臣節。

賀雪表

黃疇若

同雲蔽野。甫占寒氣之升。浮玉飛英。爰表豐年之瑞。事關扈正。喜徹龍顏。恭惟皇帝陛下。綏靖嘉師。彌綸神化。潛天而天。潛地而地。罔間幽深。曰雨而雨。曰暘而暘。同施闔闕。時屬三冬之序。祥開六出之靈。委積徘徊。凝寶光於鳩鵲。氛氳散漫。接雲氣於蓬萊。祛癘疾於崇朝。啓豐穰於嗣歲。雖均覆燾。實賴裁成。臣等俯愧變調。勉圖報稱。列賢才於庶位。無晝臥洛陽之人。激士氣於三軍。有夜入蔡州之志。

賀河清表

趙鼎臣

后祗秩祀。適陳母事之儀。坎德開先。特薦河清之瑞。表非常之景貺。昭至感之精通。凡在見聞。孰不欣忭。伏惟皇帝陛下。誕揚基命。欽率元謨。得虞帝之執中。體成湯之秉哲。人文煥而允穆。聖風衍而普和。名山

既升集四靈而爲畜。萬物咸賴。顧行葦而不傷。恬淡宅中。雍容垂拱。天鑒丕德。啓真籙以合符。民戴上仁。奄神區而望幸。而自講求茂實。俯詢僉同。增修鄧上之宮。竚發襄城之駕。威儀浸盛。兼商輅以齊驅。福應駢臻。豈漢鼎而專美。洪惟域中四大。地得一以攸寧。天生五材。水潤下而爲利。稽九河之既導。冠四瀆以稱尊。抱雖壤以縈迴。合汾源而奔注。舟師振楫。幾汨於涇泥。川后靜波。俄澄於江練。連銀漢而共色。俾浪井以成文。三門緩激箭之流。百丈見纖鱗之戲。蕩邪卻穢。挹之無遜于甘泉。薦潔明馨。用之可資於元酒。實千年之慶會。同萬世以延鴻。臣等將侍嚴祠。獲觀丕應。顧縉紳之士。已拜于封章。止旬浹之間。又窺於列奏。願示在廷之著位。式昭希代之殊祥。

徐州賀河平表

蘇軾

聖謨獨運。天眷莫違。庶邦子來。民罔告病。萬杵雷動。役不逾時。遂消東北莫大之憂。然後麥禾可得而食。人無後患。喜若更生。伏以大河爲災。歷世所病。禹治兗州之野。十有三載。乃同漢築宣防之宮。二十餘年而定。未有收狂瀾於既潰。復故道於將堙。俛仰而成。神速若此。恭惟皇帝陛下。至仁博施。神智無方。達四聰以來。衆言廣大。孝以安宗廟。水當潤下。河不溢流。屬歲久之無虞。故患生於所忽。方其決也。本吏失其防。而非天意。及其復也。蓋天助有德。而非人功。振古所無。溥天同慶。維豐沛之大澤。實汴泗之所鍾。伊昔橫流。凜孤城之若塊。迨茲平定。蔚秋稼以如雲。害既廣則利多。憂獨深而喜倍。雖官守有限。不獲趨外庭。

以稱觴而民意所同亦能抒下情而作頌。

賀獄空表

趙鼎臣

堯舜性仁。民日遷善。成康刑措。史不絕書。凡有耳目之見聞。不勝手足之舞蹈。竊以中都浩穰。在止辟以尤難。長夏鬱蒸。雖佚居而猶病。無有一人之獄。適丁千載之期。恭惟皇帝陛下。獨運離明。躬行乾健。如曰不辜之殺。寧失不經。推吾所愛之人。及其不愛。曾旬月之未幾。致囹圄之屢空。逮於畿赤之間。舉絕繯繼之繫。符瑞數興於草木。貨財耻拾於道塗。歷春夏以滋多。累百千而未已。臣獲寬吏責。仰冒天功。得以驚鈍之姿。坐成嘉美之化。沉朱李於寒水。共樂清時。鞠茂草於圓扉。殊多暇日。

和議成賀表

岳飛

視時制變。仰聖哲之宏規。善勝不爭。實帝王之妙算。念此艱難之久。姑從和好之宜。睿澤誕敷。輿情胥悅。竊以婁敬獻言於漢帝。魏絳發策於晉侯。皆盟墨未乾。敵血猶濕。俄駮南牧之馬。旋興北代之師。蓋口口不情。而口口無信。莫守金石之約。難充溪壑之求。圖苟安而解倒垂。猶之可也。欲長慮而尊中國。豈其然乎。恭惟皇帝陛下。大德有容。神武不殺。體乾之健。行巽之權。務和衆以安民。迺講信而修睦。已漸還於境土。想喜見其威儀。臣幸遇昌時。復觀盛事。身居將闔。功無補於涓埃。口誦詔書。面有慚於軍旅。尚作聰明而過慮。徒懷猶豫。以致疑。謂無事而請和者。謀恐卑辭而益備者。進願定謀而全勝。期收地於兩河。唾手

燕雲正欲復仇而報國。誓心天地。尙令稽首以稱藩。

賀光堯皇帝遜位表

馮時行

爲天下得人。睿謀素定。與萬方更始。皇統親傳。意合祖宗。道同堯舜。恭惟太上皇帝。英明獨運。慈儉躬行。勵精三紀之餘。恭已萬民之上。啓昌運於中興之日。朝諸侯於復會之時。已安神器於覆盂。眞視天下如敝屣。委無倫之富貴。與造物遊。處太上之崇高。爲天子父。功成不有。道大難名。臣謬領州麾。欣承詔旨。考百王而未見。歎美斯勤。祝萬壽之無疆。傾輸至切。

正日遙賀太上皇表

汪藻

接千載之統。推神筴以膺期。上萬年之觴。御端朝而受祉。若稽故實。遙企清光。恭惟太上皇帝。陛下體道粹精。怡神冲漠。方席宗祧之慶。遽成國步之艱。帝堯游汾水之陽。久忘天下。文王遇明夷之卦。益見聖人。臣自遠威顏。薦更時序。當璣衡之載復。悵旒扈之猶賒。鴻雁雖密。莫附帛書於沙漠。風濤中阻。徒瞻雲氣於蓬萊。

賀太上皇壽七十表

孫養晦

皇圖授聖。綿寶算於萬年。帝夢與齡。開壽編於七秩。侈熙朝之盛事。溢萬宇之歡聲。臣聞有永降年。自天祈命。大德必壽。從古而然。千二百歲而不衰。蓋修身之有道。百二十刻而成度。徒增漏以爲期。於皇上聖



之臨。度越前王之懿。授神器於雍熙之日。心懷脫屣之高。備至養於康彊之時。年及從心之適。非祠禱而  
徑躋於上壽。不導引而自籍於長生。亘古未聞。於今創見。恭惟陛下。誠參化育。道妙希夷。爲天下得人。盡  
付謳歌之啓。與造物爲侶。咸歸富壽於堯。在天心眷顧。以方隆。致睿算增崇而未已。演二首六身之數。仰  
符基命之辰。會三統九章之元。將衍後天之算。恩綸新下。孝治有光。臣持節南州。馳神北闕。稱觴漢殿。身  
雖遠於鷓行。祝壽堯封。心敢忘於虎拜。

重華宮會慶節賀表

周必大

日會析津。夙推良月。星流華渚。茲應昌期。凡居有截之區。同慶無疆之祝。恭惟至尊壽皇聖帝陛下。功成  
弗處。道大難名。不獨親其親。孝與慈而並廣。爲衆父之父。理暨性以兼融。巍然太極之尊。永矣溥天之養。  
聖謨可頌。睿算難窮。臣竊伏江城。欣逢誕節。望重華之殿。旅百何從。想萬壽之山。呼三罔怠。

會慶節賀壽皇表

陸游

錫羨無疆。丕顯生商之旦。成功不處。適當命禹之時。熙運親逢。羣情胥慶。恭惟至尊壽皇聖帝陛下。仁涵  
動植。道配堪輿。詩書所稱。何有加。卓爾規模之大。唐虞之際。斯爲盛。超然揖遜之風。積勤致王業之成。端  
拱視天命之阜。豈特極高而蟠厚。固已勒崇而垂鴻。臣等誤寘周行。久陶聖化。蓬萊隔弱水三萬里。獲進  
謁於殊庭。上古有大椿八千秋。冀默符於睿算。

車駕巡幸起居太上皇表

汪藻

年運而往。天時俄及於凜秋。日舒以長。物外方觀於浩劫。恭惟太上皇帝陛下。研幾繫表。探蹟寰中。既與夫造物者遊。孰肯以天下爲事。遺元珠於赤水。久矣相忘。飲膏霧於金莖。自然難老。臣等幸參法從。嘗侍清光。徒傾就日之誠。莫遂瞻天之意。

重華宮上尊號賀皇帝表

許開

畫袞繡裳。承燕謀於正宇。翠旗雕輦。奉鴻號於慈闈。孝本一人。慶均八表。恭惟皇帝陛下。孜孜興夏。業業繼虞。念茲莫報之恩。原此難名之德。乾稱父。坤稱母。並擬形容。河出圖。洛出書。載新篆刻。歛五福。惟皇之極。率百官若帝之初。臣分竹南邦。傾葵北闕。襲六而作一藝。敬想特書。明兩而照四方。永觀盛際。

賀皇帝慶皇太后八十表

洪适

進壽東朝。宣恩北闕。殿上皆稱萬歲。瑞應非常。海內之凡九州。歌呼同慶。臣聞喜黃髮而頌壽母。魯國有詩。摘紫房以和慈顏。晉人自賦。若長樂備常珍之奉。在前王無故事之傳。恭惟皇帝陛下。道大興齊。功光系漢。日致其孝。有曾閔事親之風。帝降之祥。得黃老養性之福。雖早朝而晏罷。必夏清而冬溫。逢八十春秋之尊。出五三經籍之右。吹律式迎於首祚。舉觴遂介於長年。歡連宮闈。澤洽黎庶。比屋起南陔之養。瑤池呈西老之符。與慶之率百官。會非曠典。建元之復三算。何啻陳編。臣遠守小邦。側聞盛禮。迴鑾紀事。微

踪嘗錄於汗青。賜札錫民。異渥獲推於戴白。

賀皇帝慶皇太后八十表

洪适

喬雲結幄。爛南極於紫霄。元日稱觴。介東朝之黃髮。郵音所寄。嘉頌式騰。竊以有三足鳥。說西崑之載勝。練五色石。聞上古之斷鼈。已標仙籍之長生。式播皇風於不朽。慶綿長樂。事始昌辰。恭惟皇帝陛下。性稟姜任。行齊曾閔。問安視膳。蕃釐專鄉於媪神。據德依仁。介福鼎來於王母。禮行膝下。歡洽宮中。八千歲春。方百分之及。一十七代史。比萬壽以無雙。臣遠使重湖。與聞曠典。仰泰階而肅序。厥路無由。祝坤極之增年。後天而老。

代進光宗御集表

王子俊

雲漢爲章。莫闕寶儲之彩。風雷作號。俾緇金匱之藏。勒成一經。昭示萬世。竊以聖人肆筆。初何意於成書。天下觀文。乃有功於範俗。繫隆昭代。通駿先猷。恭詔編摩之臣。彙列昭回之次。煥然可述。施及無疆。恭惟光宗皇帝。學富月將。聖高天縱。得書之體。得言之解。上掩百王。如日之升。如月之常。下飾萬物。疇昔燕閒之御。從容翰墨之場。周文郁郁乎。宏賁盈成之治。虞書渾渾爾。丕昭精一之傳。陛下聲欲廣文。道能繼禹。作者之謂聖。敢忘繼志述事之心。得其所以書。洞見經天偉地之妙。肆命臣工。而纂緝。載揚帝典之光華。細帙縹囊。實爲大訓。赤文綠字。皆聚此書。臣等猥以諛聞。膺茲隆旨。玩歲惕日。空彈淺見於管闕。血指汗

顏深覺聖言之天遠。

國史院進三朝正史帝紀表

洪邁

三后在天。誕著丕謨之懿。百年積德。惟憑信史之傳。方論次之開先。仰威靈之如在。載涓昧且。輒冒宸嚴。臣竊以詒厥孫謀。實爲大訓。必有不刊之典。用扶可久之基。赫赫裕陵。制作擅百王之冠。巍巍哲廟。規恢宏七世之觀。迨昭考之勃興。備盛朝之盡美。治安之極。節判所無。禹繼舜。舜繼堯。願三聖而守一道。事繫時。時繫月。宜一經以垂無窮。慨多歷於歲華。訖未施於功緒。蓋士起異同之論。而時更板蕩之餘。視熙豐符祐之成。舉是非而雜揉。攷崇觀政宣之志。頗放失于舊聞。賴故家遺俗之猶存。致偉蹟閔休之可紀。參稽定貫。允屬昌辰。恭惟皇帝陛下。宗祏宅心。美牆係念。明烈祖之成德。以庶邦惟正之供。覲文王之耿光。善孝子述人之事。欲壯西箱之御。趣哀東觀之書。臣等自愧庸虛。敢知筆削。書大事而小則簡牘。願殫緇素之勤。藏名山而副在京師。終冀汗青之望。

代進重修七司令表

王子俊

制而用之謂之法。所期合古而便今。變而通之存乎時。當亦舉偏而補弊。立爲成憲。允屬昌辰。肆令億兆之心。具曉晝一之意。竊以著爲律。疏爲令。要皆所以範民。作者聖。述者明。亦共圖于經世。必揭始觀之象。用陶不倦之民。以時纂修。爲世檢押。陛下堯綱具舉。舜法可傳。左規右矩。前準後繩。以爲民極。詳法略則。

本數未度。則有司存。粵從寶歷之紹承。咸仰聖摹之宏遠。五服薄四海。臂使指而畢從。八統御萬民。網在綱而不紊。猶恐弊生於所忽。殆將功敗于已成。爰制詔於臣鄰。俾科條於令甲。布在方冊。允釐百工。鳧居雁聚之浩繁。同歸於治。金科玉條之明白。可舉而行。勒成一代之書。庸示九圍之式。臣等賦材謏薄。庀職凌競。繼晷窮年。空玩歲月。而何補。奉命承教。乃得聖王而爲師。維幸及於奏篇。猶未知於免戾。

進大學衍義表

真德秀

伏以汗竹雖厪。何補聖經之奧。食芹欲獻。誤蒙天語之溫。以十年纂輯之餘。欣一旦遭逢之幸。惟大學設八條之教。爲人君立萬世之程。首之以格物致知。示窮理乃正心之本。推之於齊家治國。見修己爲及物之原。曾子之傳。獨得其宗。程氏以來。大明厥旨。迨師儒之繼出。有章句之昭垂。臣少所服膺。晚而知趣。謂淵源遠矣。實東魯教人之微言。而綱目燦然。迺南面臨民之要道。曩叨侍從論思之列。適當姦諛蒙蔽之時。念將開廣於聰明。惟有發揮於經術。使吾君之心炳如白日。於天下之理洞若秋豪。雖共兜難進於堯朝。豈魑魅能逃於禹鼎。不量菲薄。欲效編摩。遽罹三至之讒。徒結九重之戀。旣投閒而置散。因極意以研精。猷畝不忘君。每倦倦于報上。藩牆皆置筆。幾矻矻以窮年。首綴聖賢性命道德之言。旁采古今治亂安危之迹。必提其要。皆聚此書。凡諸老先生之講明。粗加該括。於君子小人之情狀。尤極形容。載瞻海嶽之崇深。期效涓埃之裨補。茲蓋恭遇黃帝陛下。乾旋坤轉。日就月將。於緝熙單厥心。基命適隆於成后。念終

始典于學。遜志克邁。于商宗。方將切磋琢磨。而篤於自修。定靜安慮。而進于能得。事欲明于本末。理期貫于精粗。適粹成編。冒塵清燕。止其所止。願益加止善之功。新以又新。更推作新民之化。

乞校正陸贄奏議上進劄子

蘇軾

臣等猥以空疎。備員講讀。聖明天縱。學問日新。臣等才有有限。而道無窮。心欲言而口不逮。以此自愧。莫知所爲。竊謂人臣之納忠。譬如醫者之用藥。藥雖進於醫手。方多傳于古人。若已經效于世間。不必皆從于己出。伏見唐宰相陸贄。才本王佐。學爲帝師。論深切於事情。言不離于道德。智如子房。而文則過。辯如賈誼。而術不疎。上以格君心之非。下以通天下之志。三代以還。一人而已。但其不幸。仕不遇時。德宗以苛刻爲能。而贄諫之以忠厚。德宗以猜疑爲術。而贄勸之以推誠。德宗好用兵。而贄以消兵爲先。德宗好聚財。而贄以散財爲急。至於用人聽言之法。治邊馭將之方。罪己以收人心。改過以應天道。去小人以除民患。惜名器以待有功。如此之流。未易悉數。可謂進苦口之藥石。鍼害身之膏肓。使德宗盡用其言。則貞觀可得而復。臣等每退自西閣。卽私相告言。以陛下聖明。必喜贄議論。但使聖賢之相契。卽如臣主之同時。昔馮唐論頗牧之賢。則漢文爲之太息。魏相條鼂董之對。則孝宣以致中興。若陛下能自得師。則莫若近取諸贄。夫六經三史。諸子百家。非無可觀。皆足爲治。但聖言幽遠。末學支離。譬如山海之崇深。難以一二而推擇。如贄之論。開卷了然。聚古今之精英。實治亂之龜鑑。臣等欲取其奏議。稍加校正。繕寫進呈。願陛下

置之坐隅。如見贊面。反覆熟讀。如與贊言。必能發聖性之高明。成治功於歲月。

進兩制三館牡丹歌詩狀

晏殊

化合天心。祥開卉木。協風靈雨。散爲膏壤之滋。共蒂並柯。布在密青之圃。畫品難形于桌異。瑞圖不盡於芳妍。乃詔儒臣。各摛華藻。匪太平之特盛。豈榮遇之及茲。昔者虞舜膺期。有皋陶之賡載。周宣繼業。聞吉甫之誦章。蓋默助于謨猷。不專工於辭翰。迨於漢室。尤好藝文。別館離宮。多命從臣之制作。倡優鄭衛。已無前古之箴規。中葉以還。其風未泯。永平神雀之頌。孝明稱美者五人。正元重九之篇。德宗考第於三等。並垂編簡。式著熙隆。洪惟聖運之會昌。可繼重華之輝耀。然於衆製。未復前修。思諷諭者。隱其誠而靡宣。局聲律者。艷其言而罕實。不足以裨睿覽。下達民情。效明良喜起之音。續雅頌清微之範。姑用登高而能賦。庶幾博奕之猶賢。罔叶精求。豈任多愧。臣首當庸濫。實玷恩華。輿寤以思。覩悼無極。

進先文定公文集表

胡寅

哀衷尙舊。故老形思。訓釋典文。夙簡高深之記。遺餘篇翰。更蒙清燕之求。臣伏念先臣志希明道。謀不爲身。心遠地偏。寄陶廬於三徑。人憂已樂。甘顏巷之一瓢。吟咏性情。而無雕蟲篆刻之爲。交際往來。而乏竿牘苞苴之智。中經俶擾。多所散亡。晚獲奠居。僅成編帙。精忠皎皎。每提撥亂之綱。莊語諄諄。多闡濟時之用。進則傾輸於君父。退猶關說於公卿。壯懷投老而益堅。弱齒抱痾而彌勵。自期有補。終冀一伸。邱木成

陰雖鬱春秋之志。囊書奏御。何知旦暮之逢。伏遇陛下典學格身。崇儒化俗。華袞豈惟於一字。緇衣不問於十年。乃因仲息之對揚。錫以溫顏之清問。斯文不墜。多士流傳。臣謹已校定舛訛。分成門次。爰從傳置。進備覽觀。函劍有光。既徹斗牛之象。浦珠無恙。合供旒冕之需。

謝兼侍讀表

蘇軾

重地隆名。不擇所付。清資厚祿。以養不才。伏念臣以草木之微。當天地之澤。七典名郡。再入翰林。兩除尚書。三忝侍讀。雖當世之豪傑。猶未易居。矧如臣之孤危。其何能副。恭惟皇帝陛下。聖神格物。文武憲邦。重離繼明。何煩燭火之助。大厦旣構。尙求一木之支。而臣白首復來。丹心已折。望西清之帷幄。久立徬徨。聞長樂之鼓鐘。恍如夢寐。莫報邱山之施。猶貪頃刻之榮。

謝侍講兼脩國史表

洪邁

七閩去朝。久隔鈞天之夢。一朝得覲。重趨丹地之班。仰戴鴻私。俯慚鷲鈍。伏念臣本無能績。鮮有事功。禁路持荷。蚤占榮於清貫。大州剖竹。旋待罪於輔藩。蔑報毫分。悵違顏咫尺。敢謂璽封之收。召趣前宣席之對。揚祿以真祠。還其故步。勸漢殿光祿之講。安用腐儒。纂周官石室之文。復爲太史。拜訓練之甚厚。知符任之益專。自顧慙愚。將何答塞。茲蓋伏遇陛下。道齊堯舜。仁奉祖宗。下建武之詔書。正爾恢張於治具。數正元之朝士。獨憐流落之孤蹤。肆垂齒錄之恩。俾卒汗青之業。臣敢不旁搜遠紹。廣記備言。竊闕聖學之光。



明謹次舊聞之放失。抱遺經而究終始。詎殫佔畢之勤。藏名山而副京師。實有遭逢之幸。

謝宜召入翰林狀

歐陽修

使車入里。君命在門。閭巷遙傳。豈識朝廷之故事。摺紳竦歎。以爲儒者之至榮。在臣之愚。何以堪此。竊以文章之任。自古非輕。待遇寵榮。至有私人之目。詢謀獻納。因加內相之名。恩旣異於常倫。人愈難於稱職。伏念臣器非宏達。識匪該明。學不通古今之宜。材不識方圓之用。久叨塵於侍從。曾莫著於勞能。而自出守外藩。近遭家禍。苟存餘喘。復齒周行。風波流落者十年。天日再瞻於雙闕。進對之際。已蕭颯於霜毛。慙勞有加。賜憫憐於玉色。形神若此。志意可知。身已分於早衰。心敢萌於希進。加以羈危之迹。仇嫉交攻。進退動繫於羣言。論議多煩於睿聽。雖覆載之造。每賜保全。而孤蹇儉安。常思引去。敢謂伏蒙皇帝陛下。俯憐舊物。曲軫宸慈。因內署之闕員。俾備官而承乏。臣敢不勉尋舊學。益勵前脩。感遺簪不棄之仁。竭驚馬已疲之力。庶伸薄效。少答鴻恩。

謝宜召入院表

真德秀

來從南服。未宣民版之勞。召置北扉。猥被宸綸之寵。光生里巷。榮動簪紳。竊觀列聖之用人。惟待詞臣而加禮。蓋於言語文章之外。責其論思獻納之忠。或雖忤旨而暫閒。終必棄瑕而復用。脩除翰苑。在環滁出守之餘。軾侍禁廷。亦赤壁歸來之後。豈非加歲月則其文老。涉憂患則其慮長。乃登邃殿。以備顧問。如臣

名才華弗競。黷拙自將。掌先皇內制者六年。每慚越俎。迨陛下初元之再命。竟許循墻。以驅馳州縣之頻。且廢放山林之久。見聞淺少。藝業益荒。結茅屋於雲邊。以甘終老。瞻玉堂於天上。若隔前生。敢云白首之重來。誤辱清衷之妙簡。獲玷久虛之選。幾成三入之榮。茲蓋恭遇皇帝陛下。肆筆成文。解絃更化。志孚羣聽。欲下山東之書。念在邊垂。或訪河西之事。必有端良之彥。以充供奉之班。奚取臣愚。以承人乏。臣敢不益堅晚節。思答隆知。賜宮錦而加草詔之能。雖非敢望。卽金鏡而擯任賢之要。則所自期。

### 謝知制誥表

歐陽修

伏以王者尊居萬民之上。而誠意能與下同。奄有四海之大。而惠澤得以徧及。者得非號令告詔。發揮而已哉。然其爲言也。質而不文。則不足以行遠。而昭聖謨。麗而不典。則不足以示後。而爲世法。居是職者。古難其人。乃以愚臣。而當此選。伏惟皇帝陛下。茂仁聖之姿。荷祖宗之業。日慎一日。曾未少懈。而自羗夷負固。邊鄙用師。勤儉率先於聖躬。焦勞常見於玉色。雖有憂民之志。而億姓未蘇。雖有欲治之心。而羣臣未副。故每進一善。則未嘗不欲勸天下之能。每官一賢。則未始不欲盡人材之用。雖以爵祿而砥礪。尚須訓誡之丁寧。尤假能言。以諭至意。可稱是者。不又艱歟。伏念臣雖以儒術進身。本無辭藝。可取徒值嚮者時文之弊。偶能獨守好古之勤。志欲去於雕華。文反成於樸鄙。本懼不適當世之用。敢期自結聖主之知。陛下獎之特深。用之太過。此臣所以懇讓三四。至於辭窮。而天意不回。寵命難止。尚慮頑然之未諭。更加使

者以臨門恩出非常。理難屢瀆。及俯而受命。伏讀訓辭。則有必能復古之言。然後益知所責之重。夙夜惶惑。未知所措。伏况文字之職。廁於侍從之班。在於周行。是爲超擢。不徒揮翰以爲效。自當死節以報恩。惟所使之期於盡瘁。

謝除中書舍人表

蘇轍

越從左使。擢領西垣。口出命書。身參法從。深念山林之跡。本無富貴之心。聞命若驚。固辭不獲。伏念臣生本西蜀。家世寒儒。學以父兄爲師。貧無公卿之助。私有求於祿養。輒自力於文詞。慨然東遊。無以上達。際會仁祖。訪求直言。策語猖狂。恃神聖之不諱。考官怪怒。惡悻直之非宜。孰知悟俗之言。特被愛君之詔。感激恩遇。遂忘死生。莫辭國士之知。適有私門之禍。未填溝壑。重迫饑寒。時於道塗。望見神考。一封朝奏。夕聞召對之音。衆口交攻。終至南遷之患。生雖不遇。嘗辱顧於二宗。時不見容。勢殆濱於九死。厄窮自致。詎免何言。敢云衰病之餘。復被寵光之幸。此蓋伏遇太皇太后陛下。母慈均覆。坤德無私。欲以任奴之明。躬行堯舜之道。肆求多士。以遺成王者。老畢會於朝廷。耕築不遺於林莽。遂令拔擢。猥及空疎。馮唐已衰。猶願雲中之往。貢禹雖老。未忘封事之勤。譬如木之在山。生則荷恩而死無所怨。水之於地。行則潤下而止。不敢辭臣之事君。義亦如此。欲報之意。非言所殫。

謝禮部尚書兼翰林院學士表

周必大

宗伯綴文昌之座。已高曳履之班。翰林依華蓋之星。尙玷演綸之直。當聖主謹持於官器。獨憑臣常愧於私人。臣竊考古。豪英之才。旋觀當今。文學之士。或抑淹草莽之下。或陞沉州縣之中。瞻城南尺五之天。致身無路。想玉階方寸之地。通籍幾人。况乎出入禁嚴。周旋侍從。論思獻納。日邇清光。被衣服乘。歲叨徽數。向非負一時之望。安能符衆論之公。如臣者。學不足以知方。才不足以應務。家壁四立。甘爲窮陋之民。君門九重。敢起躋攀之念。而自親逢聖作。首奉詔除。簡知特厚。於諸臣。獎擢徧更於華貴。官益崇而效寡。祿逾富而報微。左降固宜。右遷何有。忽拜便蕃之命。疊加優異之恩。師屬春官。光武卿之舊。次摛文禁苑。忝四命之新榮。煥寶帶以章身。飾繡鞵而驚駿。正使實兼數器。尙虞稱塞之難。矧伊初乏寸長。何意超躡之甚。周章就列。俯仰懷慙。此蓋伏遇皇帝陛下。道協舜華。志恢禹迹。明明在下。雖洞照於羣情。浩浩其天。每包涵於萬類。寧稍捐於爵秩。恐成棄於非葑。遂致凡才。亦與顯仕。臣敢不悉其思慮。稱是寵褒。號令文章。期助漢家之制。討論潤色。勉希鄭國之賢。苟追素餐。庶醅洪造。

謝除禮部侍郎兼直院兼侍讀表

真德秀

龍飛九五。幸逢真主之興。驛召再三。俾造邇臣之列。職親地邃。恩鉅人微。臣竊惟國勢之重輕。率視人材之聚散。王多吉士。則若鳴鳳之集梧桐。朝有直臣。則若猛獸之衛藜藿。和聲聞而妖聲自息。正氣勝而邪氣罔干。是以元祐首年。盡起諸老。隆興初政。畢萃羣賢。正塗旣開。治象可卜。於赫盛日。遙追先猷。宜得白

首耆艾之英。以重清時獻納之選。伏念臣學雖志道。材弗瘳人。忝乙第於慶元臨軒之初。綴三館於嘉定改絃之始。鼈扉久直。曾徵華國之文。螭陛屢前。徒抱愛君之志。越從予節。游易守藩。尙欣宣室之席前。忽痛鼎湖之弓墮。義輪東出。方薄海之仰瞻。漢札西來。先時髦而收召。身未登於詞掖。班已躐於儀曹。金華玉堂。假儒臣之榮寵。蘭臺石室。窺太史之祕藏。自惟何人。叨此殊獎。茲蓋恭遇皇帝陛下。德全純懿。學務緝熙。念皇天后土之監臨。居懷兢畏。察君子小人之消長。實兆興衰。謂臣雖無適用之材。知臣粗有不欺之節。擢躋邇服。許貢微忠。臣敢不戒在苟容。期於美報。惟禮可以爲國。願廣晏嬰之言。非道不敢陳前。竊效孟軻之敬。

密州謝上表

蘇軾

草芥賤微。敢干洪造。乾坤廣大。曲遂私誠。受命撫躬。已自知於不稱。入境問俗。又復過於所期。伏念臣家世至寒。性資甚下。學雖篤志。本先朝進士篆刻之文。論不適時。皆老生常談。陳腐之說。分於聖世。處以散材。一自離去闕庭。屢更歲籥。塵埃筆硯。漸忘舊學之淵源。奔走簿書。粗識小人之情僞。欲自試於民社。冀有助於涓埃。以爲公朝不廢私願。攜孥上國。預憂桂玉之不充。請郡東方。實欲弟昆之相近。自惟何幸。動獲所求。雖父兄所以處臣。其僥倖不過如此。誰云疎外。有此遭逢。此蓋伏遇皇帝陛下。躬上聖之資。建太平之業。以爲人無賢愚。皆有可用。故雖如臣等輩。猶未盡捐。臣敢不仰認至恩。益堅素守。推廣中和之政。

撫綏疲瘵之民。要使民之安。臣則爲臣之報國。

湖州謝上表

蘇軾

風俗阜安。在東南號爲無事。山水清遠。本朝廷所以優賢。顧惟何人。亦與茲選。伏念臣性資頑鈍。名迹壇微。議論闊疎。文學淺陋。凡人必有一得。而臣獨無寸長。荷先帝之誤恩。擢實三館。蒙陛下之過聽。付點南州。非不欲痛自激昂。少酬恩造。而才分所局。有過無功。法令具存。雖勤何補。罪固多矣。臣猶知之。夫何越郡之名邦。更許借資。而顯受。顧惟無狀。豈不知恩。此蓋伏遇皇帝陛下。天覆羣生。海涵萬族。用人不求其備。嘉善而矜不能。知其愚不適時。難以追陪新進。察其老不生事。或能牧養小民。而臣頃在錢塘。樂其風土。魚鳥之性。旣自得於江湖。吳越之人。亦安臣之教令。敢不奉法勤職。息訟平刑。上以廣朝廷之仁。下以慰父老之望。

到黃州謝表

蘇軾

狂愚冒犯。固有常刑。神聖矜憐。特從輕典。赦其必死。許以自新。祇服訓辭。惟有感涕。伏念臣早緣科第。誤忝縉紳。親逢睿哲之興。遂有功名之意。亦嘗召對便殿。考其所學之言。試守三州。觀其所行之實。而臣用意過當。日趨於迷。賦命衰窮。天奪其魄。叛逆義理。辜負恩私。茫如醉夢之中。不知言語之出。雖至仁屢赦。而衆議不容。案罪責情。固宜伏斧鑕於兩觀。推恩屈法。猶當禦魑魅於三危。豈謂尚玷散員。更叨善地。投

昇磨颺之野。保全樗櫟之生。臣雖至愚。豈不知幸。此蓋伏遇皇帝陛下。德刑並用。善惡兼容。欲使法行而  
知恩。是用小懲而大戒。天地能覆載之。而不能容之於度外。父母能生育之。而不能出之於死中。伏惟此  
恩。何以爲報。惟當疏食沒齒。杜門思愆。深悟積年之非。永爲多士之戒。貪戀聖世。不敢殺身。庶幾餘生。未  
爲棄物。若獲盡力。鞭箠之下。必將捐軀。矢石之間。指天誓心。有死無易。

謝量移汝州表

蘇軾

稍從內遷。示不終棄。罪已甘於萬死。恩實出於再生。祇服訓詞。惟知感涕。伏念臣向者名過其實。食浮於  
人。兄弟並竊於賢科。衣冠或以爲盛事。旋從冊府。出領郡符。旣無片善。可紀於絲毫。而以重罪當膏於斧  
鉞。雖蒙恩貸。有愧平生。隻影自憐。命寄江湖之上。驚魂未定。夢遊繯紲之中。憔悴非人。章狂失志。妻孥之  
所竊笑。親友至於絕交。疾病連年。人皆相傳爲已死。饑寒併日。臣亦自厭其餘生。豈謂草芥之賤。微尙煩  
朝廷之紀錄。開其恫悔。許以甄收。此蓋伏遇皇帝陛下。湯德日新。堯仁天覆。建原廟以安祖考。正六宮而  
脩典刑。百廢具興。多士爰集。彈冠結綬。共欣千載之逢。掩面向隅。不忍一夫之泣。故推涓滴。以及焦枯。願  
惟效死之無門。殺身何益。更欲呼天而自列。尙口乃窮。徒有此心。期於異日。

到昌化軍謝表

蘇軾

並鬼門而東驚。浮瘴海以南遷。生無還期。死有餘責。伏念臣頃緣際會。偶竊寵榮。曾無毫髮之能。而有邱

山之罪。宜三黜而未已。跨萬里以獨來。恩重命輕。咎深責淺。此蓋伏遇皇帝陛下。堯文炳煥。湯德寬仁。赫日月之照臨。廓天地之覆育。譬之蠕動。稍賜矜憐。俾就窮途。以安餘命。而臣孤老無託。瘵癘交攻。子孫慟哭於江邊。已爲死別。魍魎逢迎於海上。寧許生還。念報德之何時。悼此心之永已。俯伏流涕。不知所云。

謝南郊恩加封表

汪藻

禮洽中天。慶覃外服。猥奉十行之詔。就加五等之封。伏念臣積冒恩私。浸踰分願。昨投閑於異縣。蒙起廢於偏城。久客還家。方憩南飛之鵠。通侯授印。忽成左顧之龜。雖滲漉以維均。何遭逢之獨異。茲蓋伏遇皇帝陛下。調御萬類。藩飾羣工。屬宣室之受釐。罄寰宇而蒙福。臣適臨本部。仍胙鄉州。宋人泝澗以得封。望胡及此。漢將銀黃而誇里。榮乃過之。寵旣遠於子孫。忠敢移於生死。

謝賜御草書趙嘏南亭詩表

王禹偁

絳綃半幅。二字舞鶴之紋。宸翰三行。雲繞迴鸞之勢。天恩曲被。凡目榮觀。佩服戰兢。神魂飛越。伏惟皇帝陛下。書窮八法。學洵九流。英斷容謨。連元功而多暇。飛文染翰。縱草聖以爲娛。閒裁浙水之綾。爰寫渭南之句。宮中刀尺。翦雲霧于赤城。筆下風雷。走龍蛇于碧落。遍令中使。宣賜近臣。豈期瑣材。亦預宸眷。捧持失次。傳玩增輝。忻千載之遭逢。極一時之榮遇。讀盡二十八字。列宿韜光。宣來三十六宮。天香尙在。豈止藏于篋笥。亦將傳付子孫。堪笑二王。非墨妙筆精之作。如逢伯禹。得金簡玉字之書。感恩空拔于涕洟。受



賜更銘于肌骨。

謝賜御書孟子表

范端臣

蘊奧之義。默契於淵衷。昭回之光。發揮乎宸翰。分頒有寵。拜賜惟寅。竊以戰國縱橫。衆言散亂。乃篤生於亞聖。以丕振於醇風。闢楊墨之功。不在禹下。非堯舜之道。不陳王前。著爲一經。垂之萬世。伏遇皇帝陛下。投戈講藝。肆筆成書。旣深造于七篇。復妙臻乎八法。寫之琬琰。炳茲丹青。鳳翥鸞翔。載出河圖之畫。金聲玉振。復傳洛誦之文。臣猥被鴻私。親瞻睿藻。樂與諸生之講習。益昭治世之昇平。

謝賜御書張九齡千秋金鑑錄故事表

眞德秀

節值千秋。輒獻蕝蕝之論。恩頒一札。獲瞻奎壁之光。俯拜難勝。夔藏有耀。伏念臣慚無寸技。幸際兩朝。昔瑞慶方臨。嘗豫陳永命之戒。今天基有屆。敬復據曼壽之言。蓋謂錦囊效貢之徒勤。不若丹辰獻箴之有補。經帷入侍。天語垂褒。觀倦倦進說之辭。眞懍懍愛君之意。旣下軒墀之拜。甫還蓬藿之居。賜雲章一人。幾類邇英之故事。上金鏡五卷。有懷開元之諍臣。不圖螻蟻之微。驟覩龍鸞之妙。恭遇陛下。性全淵懿。學懋緝熙。博攷舊聞。審萬古忠邪之判。緬懷遺直。係一時治亂之分。爰灑宸毫。以勵臣節。臣猥繇愚拙。誤沐褒嘉。百祿是宜。敢第述商頌降生之瑞。三宗可法。願益遵周書無逸之規。

謝賜衣帶表

楊萬里

瀛州方丈驚頭白以初登內帛宮衣。偕腰黃而並受。迺九重之異數。非八柄之彝章。自天有賚。踏地而偃。茲蓋伏遇皇帝陛下。典嚴在笥。惠篤薦紳。軫仲由之縵袍。錫之三服。惻啓期之帶索。束以兼金。而臣感恩不貲。圖報無所。蔑然絲薄。多慚疊雪之香。齒爾摧頽。第怯萬釘之寶。

謝賜對衣金帶馬狀

蘇軾

漢官三服。已分密麗之珍。唐監八坊。復下權奇之駿。拜嘉甚寵。省已何功。伏念臣受材迂踈。賦命寒蹇。幼師季路。止服緼袍。長慕少游。欲乘下澤。目眩重金之耀。神驚四牡之良。俛仰自維。周章失次。此蓋伏遇皇帝陛下。憂勤黎庶。寤寐雋賢。故損廩庫之儲。以廣英雄之殼。致茲辱陋。亦被寵光。臣敢不求稱於衷。益鞭其後。薄德盛服。當戒維鵜之篇。強力安邦。庶幾有駟之頌。

謝賜對衣金帶馬狀

蘇軾

錫之上駟。敢忘致遠之勞。佩以良金。無復忘腰之適。執鞭請事。顧影自慙。恭惟皇帝陛下。禹儉中修。堯文外煥。長轡以御。率皆四牡之良。所寶惟賢。豈徒三品之貴。出捐車服。收輯事功。而臣衰不待年。寵常過分。枯羸之質。匪伊垂之。而帶有餘。歛退之心。非敢後也。而馬不進。徒堅晚節。難報深恩。

謝賜對衣金帶鞍馬表

張守

討論潤色。已懼空殮。衣被服乘。更蒙蕃錫。冒寵章而增悻。超禁路以知榮。伏念臣久安龍具之貧居。豈識

蟻封之試足。羈孤寡。援誰憐。范叔之寒。災禍冥心。久悟寒翁之失。竊重金之顯服。跨沃轡之名駒。病骨支離。容恩優渥。此蓋伏遇皇帝陛下。仁而徧物。哲以知人。駿骨而市千金。灼知誠意。狐裘之非一腋。務盡衆長。乃捐在筭之珍。曲示解驂之惠。臣敢不仰思藩飾。俯效馳驅。束帶而使與言。儻不愧搢紳之列。據鞍而示可用。庶幾逃負乘之譏。

謝賜銀合臘藥表

周必大

雲章封醴。寶劑實齋。適屬凝嚴。頓蘇疲瘵。伏念臣甫從閒散。起備蕃宣。雖恪守于官箴。曾未除于民瘼。豈圖宸渥。爰舉邦彝。詔塗芝檢之黃。光于下澤。藥按桐君之錄。滋以上池。手披出紵之溫。心失折綿之凜。此蓋伏遇皇帝陛下。慈憐臣庶。軫念藩維。已施起廢之功。更廣蠲痾之賜。恩勤至矣。報稱謂何。臣謹當因六尚之珍良。察一方之疾苦。乃身無疾。敢獨享於君仁。所部有瘳。期咸霑于聖惠。

謝賜銀合臘藥表

周必大

天無私覆。外懷五王之臣。帝有恩言。中錫萬金之劑。凜乎歲晚。倏爾春回。伏念臣昨被綸書。起司符竹。考湘壘之九辯。閱楚戶之三霜。多病所須。常求藥物。十全爲上。未造醫師。茲逢漢宮臘飲之時。乃冒唐殿銀罍之澤。茲蓋伏遇皇帝陛下。道遵皇極。治格泰和。惟疾之憂。每推父母之愛。好生之德。更廣乾坤之仁。故當凝沍之辰。特有珍良之賜。臣敢不勤于服食。稱是恩榮。候屬祁寒。深察小民之怨。居防美疾。載思惡石。

之生。

謝賜柑表

金使闕名

聘禮既陳。祝帝齡於紫闕。恩華尚異。賜僊實於公郵。方厥包未賈之期。捧茲德惟馨之賜。天香滿袖。染湘水之清寒。雲液盈盤。挹洞庭之餘潤。梓里豈遑於遺母。楓庭切願於獻君。感德滋深。喻言罔既。

謝致仕表

歐陽修

愚誠懇至。曲軫于皇慈。寵命優殊。特加于常品。本期得謝。更此叨榮。伏念臣猥以庸近之材。早遭休明之運。不通之學。既泥古以難施。無用之文。復虛言而少實。是以三朝被遇。四紀服勞。蒙德重于邱山。論報亡於毫髮。而年齡晚暮。疾病尪殘。輒希知止于前人。不待及期而後請。自陳悃悞。屢至漕煩。既久。歷于歲時。始曲蒙于開可。仍超加于異數。非止賜于殘骸。道愧師儒。乃忝春官之峻秩。身居獻畝。而兼書殿之清名。至於頭垂兩鬢之霜毛。腰束九環之金帶。雖異負薪之里。何殊衣錦之歸。使閭巷咨嗟。共識聖君之念舊。指紳感悅。皆希後福之有終。豈惟愚臣。獨受大賜。此蓋伏遇皇帝陛下。無私覆物。博愛推仁。以其夙幸遭逢。密契風雲之感會。曾經服御。不忘簪履之賤。微致此便蕃。萃于衰朽。雖伏櫪之馬。悲鳴難戀于君軒。而曳尾之龜。涵養未離于靈沼。餘生易畢。鴻造難酬。

亳州乞致仕第二表

歐陽修

臣聞神功不宰。而萬物得以曲成者。惟各從其欲。天鑒孔昭。而一言可以感動者。在能致其誠。敢傾虔至之心。再瀆高明之聽。伏念臣本以一介之賤。叨塵二府之聯。知直道以事君。每師心而自信。然而既乏捐軀之效。又無先覺之明。用之已過其分。而曾不自量。毀者不堪其辱。而莫知引去。幸賴乾坤之再造。得逃陷穽之危機。仍許被於要權。俾退安於晚節。今乃苦於衰病。莫自支持。顧難冒於寵榮。始欲收於骸骨。敢期聖念。過軫天慈。謂雖迫于桑榆。未忍棄於草莽。竊以古今之制。沿襲不同。並由兩漢而來。雖處三公之貴。每上還於印綬。多自駕於車轅。朝去朝廷。暮歸田里。一辭高爵。遂列編民。豈如至治之朝。深篤愛賢之意。每示隆恩之典。以勸知止之人。故雖有還政之名。而仍享終身之祿。固已不類昔時之士。無殊居位之榮。然則在臣素心。雖切退探之志。迹臣所乞。尙虞僥倖之譏。伏望皇帝陛下。惻以深仁。矜其至懇。俾解方州之任。遂歸環堵之居。固將優游垂盡之年。涵泳太平之樂。惟辛勤白首。迄無一善之稱。孤負明時。莫報三朝之德。此爲慙恨。何可勝陳。

亳州乞致仕第四表

歐陽修

未忍遽捐。幸曲憐於舊物。逮茲再黷。蓋中迫於危誠。進冒誅夷。俯深殞越。伏念臣以一介無能之賤。荷三朝特達之知。仁宗擢自諸生。俾參二府。先帝力排羣議。深察孤忠。暨逢神聖之纂臨。竊幸風雲之感會。至於辨正誣枉。保全始終。雖天地之施無私。恩非責報。而犬馬之微自效。力不逮心。繼之衰疾之纏綿。加以

年齡之晚暮。寵榮既過。小器盈而必顛。筋力已疲。飛鳥倦而思止。輒露乞身之請。願諧解組之歸。而皇慈惻然。明詔屢下。示廓含容之大度。慰安憔悴之餘生。祇服訓辭。惟知感涕。然而忠信所以事上。理無弗踐之空言。進退各有其宜。力或不能而常止。雖禮著引年之制。必待及時。而身有負薪之憂。亦容辭仕。是敢再彈悃悞。仰冀哀矜。伏望皇帝陛下。軫堯舜之深仁。推乾坤之曲造。憫其確至。賜以允俞。俾還穎尾之居。遂養漳濱之病。再念臣早從壯歲。粗學文辭。久冒榮階。當豐祿賜。尚能遇樵夫而談道。宣上德以諭愚民。與故老而揮金。均君恩而榮里巷。以終晚節。永荷鴻私。

乞常州居住表

蘇軾

臣聞聖人之行法也。如雷霆之震草木。威怒雖甚而歸於欲其生。人主之罪人也。如父母之譴子孫。鞭撻雖嚴而不忍致於死。臣漂流弃物。枯槁餘生。泣血書詞。呼天請命。願回日月之照。一明葵藿之心。此言朝聞夕死無憾。臣昔者嘗對便殿。親聞德音。似蒙聖知不在人後。而狂狷妄發。上負恩私。既有司皆以爲可誅。雖明主不得而獨赦。一從吏議。坐廢五年。積憂熏心。驚齒髮之先變。抱恨刻骨。傷皮肉之僅存。近者蒙恩量移汝州。伏讀訓詞。有人材實難。弗忍終弃之語。豈獨知免於繲綆。亦將有望於桑榆。但未死亡。終見天日。豈敢復以遲暮爲嘆。更生僥覲之心。但以祿廩久空。衣食不繼。累重道遠。不免舟行。自離黃州。風濤驚恐。舉家重病。一子喪亡。今雖已至泗州。而費用罄竭。去汝尚遠。難於陸行。無屋可居。無田可食。二十餘

口不知所歸。飢寒之憂。近在朝夕。與其強顏忍恥。干求於衆人。不若歸命投誠。控告於君父。臣有薄田在常州宜興縣。粗給饘粥。欲望聖慈。許於常州居住。又恐罪戾至重。未可聽從。便安輒紆微勞。庶蒙恩貸。臣先任徐州口。以河水浸城。幾至淪陷。臣日夜守捍。偶獲安全。曾蒙朝廷降勅獎諭。又嘗選用沂州百姓程棐。令購捕兇黨。致獲謀反妖賊李鐸。郭進等一十七人。亦蒙聖恩保明放罪。皆臣子之常分。無涓埃之可言。冒昧自陳。出於窮迫。庶幾因緣僥倖。功過相除。稍出羈囚。得從所便。重念臣受性剛褊。賦命奇窮。既獲罪于天。又無助于下。怨尤交積。罪惡橫生。羣言或起于愛憎。孤忠遂陷於疑似。中雖無愧。不敢自明。向非人主獨賜保全。則臣之微生。豈有今日。伏惟皇帝陛下。聖神天縱。文武生知。得天下之英才。已全三樂。躋斯民於仁壽。不棄一夫。勃然中興。可謂盡善。而臣抱百年之永嘆。悼一飽之無時。貧病交攻。死生莫保。雖鳧雁飛集。何足計於江湖。而犬馬蓋帷。猶有求於君父。敢祈仁聖。少賜矜憐。

國朝麗體金膏卷八

拜颺集 遺補

南郊頌

梁蕭綱

職貢圖序

梁蕭繹

高祖武皇帝諡議

蕭繹

梁簡文帝法寶聯璧序

蕭繹

皇太子臨辟雍頌

梁徐陵

爲百寮賀雪表

唐李嶠

賀老人星見表

唐李商隱

姚州道破賊露布

唐駱賓王

進千秋節金鏡錄表

唐張九齡

辭學指南

宋王應麟

宋四六摘句



賜紗扇筆墨等件謝摺

國朝朱珪

賜筆墨等件謝摺

國朝朱珪

賜玉如意貂皮褂謝摺

國朝朱珪

謝賜御筆熱河考並御識墨刻一卷

國朝阮元

謝賜御筆筆誤識過墨刻一卷

國朝阮元

謝賜御筆兵部奏凱兵丁各歸營伍及福康安奏西藏善後事宜詩墨刻共二卷國朝阮元

南郊頌并序

梁蕭綱

臣聞惟天爲大。聖人敬其德。知幾其神。聖人契其道。故龍宮弱言之。后合揆於蒼昊。鳥紀垂衣之君。昭格於上帝。莫不巍巍乎。穆穆乎。渙汗於綠篇。氛氳於丹冊者矣。我梁皇帝之御天下也。乘燁祗之盛曜。卽璧日之遐照。等乾覆之簾養。合坤載之靈長。四三六五之意。十堯九舜之明。名與功偕。業將時並。自撥亂反正。伐罪弔民。馮玉几。握金鏡。君臨萬國。於今二十有二載也。緯天維。理地軸。移澆風於末俗。反淳正於區中。化不言而先顯。教不嚴而已肅。流落復雅。遠符雲韶之世。墜禮還章。非因忠信之薄。九垓同軌。四海無波。儲明變照。儀天作雨。三袞咸作。叶化台光。麴蘗王風。曠梅帝載。塵清世晏。蒼兕無用。其武功。運謚時平。鷄鷺咸脩。其文德。桃林散甲。華山優刃。玉門罷候。紫塞沉鋒。屠羊釣壑之士。厭洗耳而襲簪佩。版築藏巖。

之逸。去燥穀而紆珩組。異人俊乂。旣間出而在官。世鏡河仙。亦雍容而廊廟。蹇蹇同於多士。諤諤比乎得人。五典三墨。旣葳蕤於壁水。九流八索。亦繽紛於石渠。畫一之政。萬邦表於時和。三章之律。百姓沐於仁壽。於是龍光之地。日浴之鄉。紫舌黃支。頭飛鼻飲。自西自南。無思不服。款關質子。稱臣內向。珠樹素禽。越火枝之地。銀甕邛杖。踰沉羽之涘。出赤野而連翩。度玄沙之泱泱。於是嘉祥被。衆瑞登。金人澤馬。丹甌玉雞。三角九尾。四眉六足。抽鋪地之九莖。發端門之連理。參差於郊藪。布濩於宮闕。府無虛月。史弗能記。周稱黃鳥之旗。夏有玄珪之錫。無以踰此嘉祥。方茲總萃。道洽世昌。國殷民阜。鄉知舜讓。邑比堯封。委粟柄畝。神絲被澤。可謂我化若風。民應如草。我靜如鏡。物動猶煙。天子猶未明求衣。日昃不勸。撤膳匪躬。詢輿訪道。鑾旗徐動。棄千里而弗乘。寶瑟無虞。捐百金而不服。廣行四等。被慈雨於枯根。大闡三朝。驚法雷於羣夢。曲成萬物。去殺愛生。幽弊之民。與蒼雷而共悅。否滯之義。同谷風而開扞。昆蟲得性。跂蠢欣生。三驅有緩前之禽。九門無餒獸之藥。至德之事如此。太平之風如彼。乃以恭肅神祇。理通孝敬。江左以來。爽塏未闢。爰命將作。揆日載營。三靈叶響。百工咸事。宛如神造。儼類仙居。沖秘隱嶙。跨千畝於晉日。閑曠麗遠。吞七里於漢年。五達四通。廓郊彌野。南瞻重嶽。北眺芒嶺。東臨灞澹。西望舊豐。紆餘委蛇。邱陵起伏。澎湃嶢峩。山川異態。飛梁邃宇。洞燭穴懸。紫殿仙宮。霞鸞鳥翥。霧映倒梁。日光疎飯。玉桃卷葉。銀樹抽芳。百果千株。三珠八桂。朝葉與蜜露共鮮。晚花與薰風俱落。露禽乍聚。望比翼之翱翔。歸飛時宿。關同心之夜響。

故以熊能灼灼。炫兩明而仰七曜。紛紛沐沐。承五煙而帶三靈。圓丘閑靜。紫壇肅設。五精之場。千神之位。八塔宏麗。四維博敞。宛若千仞。狀懸流之仙館。煥如五彩。同瑤山之帝壇。石牒神昌之瑞方。臻金縷飛光之徵。永固是雕。是琢。鄙茅茨之爲倫。非珠非玉。噴甘泉之已奢。望昔方今。獨高千古。沿襲異等。質文斯中。於是歲在單閼。星次訾陬。律中太簇。日惟辛卯。特有事於南郊。甸師清野。封人墮宮。朱幕夕峙。帷宮宿設。曉漢斜陰。挈壺升漏。天子御玉輅。動金根。八驥揚衡。雙龍翼蓋。雲罕徐迴。鳴鏡韻響。風承豹尾。日映鷓冠。萬騎天行。千乘雷動。石鎧犀衣之士。連七萃而雲屯。珠旗日羽之兵。亘五營而星列。鬱鬱阡阡。震震填填。充溢乎國都。彌漫於鄴邑者也。若乃迴輿降蹕。薦禮帝儀。揖太清。秩羣望。被太裘。服山冕。恭蒼璧之明祀。穆靈壇之禋敬。黍稷非馨。明德惟馨。日曜彤精。天澄翠色。百僚師師。九官濟濟。千神叶福。萬億均慶。六典斯備。三禮必該。焚柴告成。罔不欽若。翠煙升絲。同河濱之瑞雲。丹燎燭天。若帝鄉之美氣。雲門麗舞。咸池廣樂。已叶九韶之曲。復諧六列之奏。金匏旣動。望蜿蟬之遊龍。玉磬徐鳴。觀參差之舞鳳。桂鞞駕肩。士女填噎。接袂爲幃。連裾猶堵。鼓腹擊轅。行歌舞抃。然後紆玉輦而謝書生。登靈臺而望雲物。欽明美化。跨萬古於茲日。廣運愉樂。表千載於當今。方當巡云云之禮。啓亭亭之業。封天答睠。禮地徵靈。南山之壽無極。七百之基長固。豈不懋哉。豈不盛哉。菲薄微臣。謬與藩服。馳心休禮。秣馬之願無由。徒罄褊辭。清風之藻多愧。敢敷庸理。獻頌十章。其辭曰。

元始道一。渾德氛氲。遙哉邃古。夏矣初分。磅礴地載。清朗天文。大人觀物。生民樹君。蛇驅龍準。作樂垂衣。皇圖炤灼。帝篆葳蕤。廓寥中代。合聖與誰。於鑠我后。命世天飛。玄默馭辯。寂照秉真。就雲握歷。望日臨民。謙光履德。義禮稱珍。車書同軌。天下歸仁。期章孔備。盛化宏道。酌衢敬賓。欽賢愛老。變正是珍。燭車非寶。如海之深。如日之杲。肅恭明神。逖聽前踵。配天道尊。迎陽義重。玄酒陶匏。燔柴雲聳。跨舞論韶。籠堯稱拱。赫矣郊宮。載惟靜謐。肅肅禁圍。陰陰仙室。六戎列野。八鸞照日。架殿星羅。重宮霧出。蒲萄金橘。靈壽木難。表禁開暑。貞檜陵寒。山池壯麗。階閣彤丹。葉垂疊雨。花落重欒。康哉盛德。美矣世豐。三辰炳耀。七政永隆。五方來泊。四隩茲通。懸繩度竿。駕鹿追風。旣降懋化。復觀瑞滋。金車出野。玉露霑墀。紫檠神草。華平瑞芝。長愉汪濊。永固雍熙。照天漏浚。遠肅邇睦。惠靡齊民。恩彌比屋。式光悼史。踰斯郁郁。皇哉康哉。同斯景福。

職貢圖序

梁蕭 繹

竊聞職方氏掌天下之圖。四夷八蠻。七閩九貉。其所由來久矣。漢氏以來。南羗旅距。西域憑陵。創金城。開玉關。絕夜郎。討日逐。觀犀甲則建朱崖。聞蒲萄則通大宛。以德懷遠。異乎是哉。皇帝君臨天下之四十載。垂衣裳而賴兆民。坐巖廊而彰萬國。梯山航海。交臂屈膝。占雲望日。重譯至焉。自塞以西。萬八千里。路之峽者。尺有六寸。高山尋雲。深谷絕景。雪無冬夏。與白雲而共色。冰無早晚。與素石而俱貞。踰空桑而歷昆吾。度青邱而跨丹穴。炎風弱水。不革其心。身熱頭痛。不改其節。故以明珠翠羽之珍。細而弗有。龍文汗血。

之驥。卻而不乘。尼邱乃聖。猶有圖人之法。晉帝君臨。實文樂賢之象。甘泉寫閼氏之形。後宮玩單于之圖。臣以不佞。推轂上游。夷歌成章。胡人遙集。款關蹶角。沿泝荆門。瞻其容貌。訴其風俗。如有來朝。京輦不涉。漢南別加訪採。以廣聞見。名爲貢職圖云耳。

高祖武皇帝謚議

梁蕭繹

臣聞翼善傳聖曰堯。仁聖盛明曰舜。受禪成功曰禹。除虐去殘曰湯。謚者行之跡。號者功之表。雖賤不誅。貴卑不誅尊。而彰乎名者。盛德之嘉號也。被於物者。治定之實錄也。斯所以聲明煥乎鍾石。昭晰備於絃管者焉。伏惟天縱欽明。惟睿作聖。功超三五。聲踰七十。仰之彌高。就之彌遠。載潛載躍。乃武乃文。先是木運告終。羣后改屬。乾維罔構。地紐如崩。禘祀阡危。公卿盱食。九牧有淪胥之悲。八表興橫流之歎。乃凝威黑水。表瑞丹陵。雲合景從。表裏禔福。受終文祖。允恭克讓。知黔首不可以無歸。蒼生不可以無主。降汾陽之遠志。不得已而臨之。於是類帝禪宗。革命創制。禘郊式展。殷薦新潔。臨茲大寶。化與和氣俱宣。扇此王風。政與秋霜並肅。言懸日月。功格區宇。不以紫宸爲貴。不以黃屋爲尊。政謚刑措。民殷國阜。虹旌式卷。堡燧載清。胥象相因。環楛無曠。天衢亨泰。王道升平。南海候風。東溟奉貢。膏露凝枝。慶雲觸石。山開蒼壁。地出玄珪。驃騎把鉞。則休屠款塞。太尉抗旌。則名王蹶角。聲教所漸。浹靈蛇之都。威令所行。通燭龍之外。開庠建序。布獲於成均。正俗移風。氛氳於司樂。虛納十亂。引諒直之規。廣闢四門。宏招賢之德。青衿知擊壤。

之性黃髮恣鼓腹之歡。加以鑽味微言。研精至道。文終所牧之典。史倚所讀之書。無輟萬機。日且千遍。馳郁郁之聲。表乾乾之德。允所謂皇哉君哉。日用而不知者矣。方且告成岱嶽。鏤升平之玉簡。昭事梁甫。秘禮首之金繩。而文王明夷。事伴往冊。黃帝橋山。痛深前典。萬有淪傷。三辰掩曜。人祗軫慕。山海含情。悲切陟方。哀深遏密。煩冤荼毒。貫切心髓。風樹不靜。陟岵何期。思所以欽若九功。仰稽七德。

梁簡文帝法寶聯璧序

梁蕭繹

竊以觀乎天文。日月所以貞麗。觀乎人文。藻火所以昭發。况復玉毫朗照。出天人之表。金牒空解。生文章之外。雖境智冥焉。言語斯絕。詠歌作焉。可略談矣。粵乃書稱湯誥。篇陳夢說。昔則王畿居亳。今則帝業維揚。功施天下。我之自出。豈與姚墟石紐。譙城溫縣。御龍居夏。唐杜入周而已哉。皇帝垂衣負辰。辨方正位。車書之所會同。南暨交趾。風雲之所沾被。西漸流沙。武實止戈。乘宜生之劍。樂彰治定。滅庖犧之瑟。相兼二八。知微知彰。將稱四七。如貌如虎。寧俟容成。翠屋之遊。廣成石室之會。故以宗心者忘相。歸憑者常樂。昔轉輪護法。南宮有金龍之瑞。梵天請道。東朝開寶蓋之祥。盡善盡美。獨高皇代。古者所以出師入保。冬羽秋籥。實以周誦幼沖。用資端士。漢盈末學。取憑通議。大傳之論孟侯。小戴之談司業。山川珍異。俟郊迎而可知。帷幄後言。籍墾田而求驗。以今方昔。事則不然。我副君業邁宣尼。道高啓筮之作。聲超姬發。寧假下蘭之頌。譬衡華之峻極。如渤澥之波瀾。顯忠立孝。行修言道。博施尚仁。動微成務。智察舞雩。爻分封蟻。

爰初登仕。明試以功。德加三輔。威行九流。董師虎據。操鉞蟬冕。津卿濟沈。物仰平分之恩。沂岱邛岷。民思後來之政。陳蒼留反裘之化。淮海高墨幘之聲。威漸黃支。化行赤谷。南通舜玉。北平堯柳。朝鮮航海。夜郎款塞。然後體道方震。雨施雲行。漢用戊申。晉維庚午。增暉前曜。獨擅元貞。恩若春風。惠如冬日。履道爲輿。策賢成駟。降意韋編。留神細帙。許商算術。王圍射譜。南龜異說。東馳雜賦。任良弈棋。羨門式法。箴興琴劍。銘自盤盂。無不若指諸掌。尋涇辨渭。重以鳳豔風飛。鸞文鸞豎。織者入無倫。大者含元氣。韻調律呂。藻震玄黃。豈俟取讚彥先。詢聞雅主。至於鹿園深義。龍宮奧說。遠命學徒。親登講肆。詞爲憲章。言成楷式。往復王粲。事軼魏儲。酬答蔡謨。道高晉兩。似懸鍾之應響。猶衢鑄之待酌。率邇者踵武。逝聽者風聲。是使金堅秘法。寶冥夕夢。無懷不滅。華胥夜感。自非建慧橋。明智劍。薰戒香。沐定水。何以空積忽微。歷賢劫而終現。黍累迴幹。蘊珠藏而方傳。加以大秦之籍。非符八體。康居之篆。有異六爻。二乘始關。譬馬傳兔。一體同歸。棄犀宗象。潤業滋多。見思平積。本有凝邈。了正相因。雖談假績。不攝單影。卽此後心。還蹤初焰。俱宗出倒。蓮華起乎淤泥。並會集藏。明珠耀於貧女。性相常空。般若無五時之說。不生煩惱。涅槃爲萬德之宗。無不酌其菁華。撮其旨要。探彼玳鱗。拾茲翠羽。潤珠隋水。抵玉崑山。每至鶴關。旦啓黃綺之儔。朝集魚燈夕朗。陳吳之徒。晚侍皆仰稟神規。躬承睿旨。爰錫嘉名。謂之聯璧。舍珠而可擬璧。與日而方升。以今歲次攝提。星在監德。百法明門。於茲總備。千金不刊。獨高斯典。合二百二十卷。號曰法寶聯璧。雖玉杯繁露。若倚兼。

葭金臺鑿楹似吞雲夢。繹自伏櫪西河。攝官南國。十迴鳳琯。一奉龍光。筆削未勤。榮卜商之序。穆古盛則。又慙安國之製。謹抄纂爵位。陳諸左方。

皇太子臨辟雍頌

梁徐陵

臣聞天大王大。詳於道德之言。天文人文。顯於爻象之說。是以大君革命。黔首所以庇焉。聖人創物。文籍所以生焉。咸由此道。制爲民極。莫不對越上靈。裁成庶類。濟世育德。昭彼昆蟲。皇帝世膺下武。體茲上德。握天鏡而授河圖。執玉衡而運乾象。皇太子耀彼重離。光茲七鬯。儀天以文。化成天下。侍中國子祭酒新安王。宗室羽儀。衣冠準的。惟善爲樂。造次必儒。粵以十一年三月二十一日。受詔宏宣。發論語題。攝齊升堂。攝衣卽席。對揚天人。開闢大訓。清言旣吐。精義入神。副德爰動。音口鋒起。問難泉涌。辨論綸之異。定倫理之疑。玉振鏘鏘。雲浮雨布。介王奉繫聖蹤。馳辯秀出。信令張禹慙其師法。何宴慙其訓詁。穆穆焉。洋洋焉。此實虞朝之盛德。生民之壯觀者也。臣抑又聞之。魯頌聿興。史克宣其懿。晉雍大啓。王廙逞其詞。所以述休平之風。揚君上之德。輕以下才。敢爲頌曰。

皇運勃啓。膺圖受命。紫蓋東臨。黃旌南映。積仁累德。重明疊聖。四海無浪。三階已平。儲駕戾止。和鸞有聲。宏風講肆。崇儒肅成。丹書貴道。黃金賤籛。洙泗興業。闕里增榮。

爲百寮賀雪表

唐李嶠



臣聞至道光被而冲和感發。玄化沉潛而祥物昭應。伏惟陛下合德天地。齊光日月。陶正氣之氤氳。降元符之胙饗。用能經緯六合。驅馭百靈。垂旒法宮而品物清晏。揆景中土而風雨休若。三元肇革。九陽初動。撞黃鍾而布氣。順玄冥而率職。層陰候律。豐澤順時。蒼蔚方興。起泰山之膚寸。參差薦委。自平地而盈尺。銅街皓其如素。金隄紛其遂滿。縈樓棲檻。疑壁臺之九重。落絮飄花。似芳林之二月。豈唯洛神呈象。來舞帝宮。故亦海騎相趨。下朝僊闕。東臯欣而望歲。南史慶而書祥。萬寶登秋。居然可詠。雙銅叶唱。卽事非遙。自非睿感通微。乾心輔德。何以降神靈之滋液。發兆庶之歡慶。臣等恭承玄造。沐浴太和。欣聖澤之滂沛。對天休而踴躍。

賀老人星見表

唐李商隱

聖惟合德。坤實效祥。必垂有爛之文。以表無疆之壽。臣聞玄象示人。昊穹凝命。曜爲經而宿爲紀。則有常名。斗挹酒而牛服箱。或標虛號。未若候時而出。有道則彰。居五福之先。在三辰之列。伏惟陛下昭明老契。游泳莊寰。屆是中秋。呈茲上瑞。况見於午位。又屬寅時。仰考玄符。乃有深意。自南耀彩。將弘解慍之風。近曉流光。欲助無私之日。皇心載裕。靈鑒孔昭。凡居率土之濱。皆慶後天之壽。臣誤蒙重寄。實遠清光。送玄燕於梁間。傷時自切。望白榆於天上。厥路無由。

姚州道破賊露布

唐駱賓王

尙書兵部臣聞北極列象六合奉天子之尊南面乘乾一統成聖人之表是知衣裳所會義有集于殊隣霜露所由誠無育于異類故塗山萬國誅後至者防風丹浦一戍緩前禽者就日然則利弧矢以威天下雷霆以震域中四時行焉天道不能去煞五兵備矣皇業所以勝殘雖義切救焚苟順時以濟物恩深祝網不獲已而用兵伏惟皇帝陛下登翠媯以握圖憲紫微而正象玄功不宰混太始以凝神至道無圖佇華胥而得夢闡文教以清諸夏崇武功以制九夷環海十洲通波太液之水鄧林萬里交影甘泉之樹反踵穿胸之域襲冠帶以來王奇眩僮耳之會奉正朔而請吏逆賊蒙儉和舍等浮竹遺胤沉木餘苗邑殊禮義之鄉人習貪殘之性日者皇明廣燭帝道遐融頗亦削左衽而被朝衣解椎髻而升華冕而豺狼有性梟獍難馴遂敢亂我天常變九隆而背誕負其地險攜七郡以稽誅搔亂邊疆敝被州郡是用三門投律長驅無戰之師五月渡瀘深入不毛之地去月二十日軍次三肫籬鎮前後捕得生口知守捉山差傍山連結十部蠻有徒五萬衆此山卽南中巨傍也崗巒千里西通大荒之郊溪谷萬重南極炎州之境聳喬林而掙月陰靈有假道之標拔崇巖以隱天陽烏無迴翼之地峯危束馬路絕回車賊踞臨代之形垂建鉞之勢徵風召雨蝟起蜂飛野雜種以挺災封狐十里肆沉黎而作孽雄虺九頭臣以爲制敵以權柔遠者理成於德教伐叛以義決勝者不在於干戈於是廣布朝恩恭宣帝澤申之以安撫曉之以存亡信重蠻陬無負黃龍之約賞隆漢爵不踰白馬之盟地接周疆詞屢彈于喻蜀俗通盤飢聲不輟于吠堯

臣遣左二軍子總管寧遠將軍前守右驍尉井陘縣開國男劉玄暉等銜枚遠襲。卷甲前驅。偃危旆而設。潛兵疑從天落。乘間道而掩不備。若出地中。又遣右二軍子總管明威將軍行左武衛翊府郎將高奴弗。率左武衛天水府折衝都尉張仁操等。陟南山之南。衝其要害之路。又遣左一軍子總管前後金吾衛翊府郎將孫仁感。率府左果毅都尉王文雅等。凌北山之北。絕其飛走之途。賊首領楊虔。柳諾。設弄諾。覽期等。振螳螂之力。拒轍當輪。縱蚊蚋之羣。彌山滿谷。劉惠基。高奴弗。孫仁感等。並忠勤克苦。知略遠聞。識明君之重恩。輕生有地。提太阿之神劍。視死無時。彎弧而兇黨土崩。舉刀而妖徒瓦解。雖危若沸鼎。未窮梟首之誅。救死扶傷。獨致析骸之爨。二十日。臣遣副總管兼安撫副使定遠將軍前左驍衛府中郎將令狐智通。率右武衛良將壯府左果毅都尉韓惠德等。擁貔豹之雄。順天機而左轉。遣副總管兼安撫使守銀州刺史李大志。率前左衛靜福府果毅都尉陳宏義等。率犀象之卒。乘地軸以右迴。又遣行軍司馬守雋州都督府長史梁侍辟。率守金吾衛宜昌府果毅都尉閻文成等。總投石拔距之林。蹈中權而撫其背。又遣前守右威衛龍西府果毅都尉康留買等。勝躍截歡金之騎。犯前茅而扼其喉。臣率守衛清官府左果毅許懷秀等。橫玉弩以高臨。提金鉦而直進。玄雲結陣。影蜜西郊。赤日揮鋒。氣橫南斗。飛塵埃而布地。白日爲之晝昏。積氛浸以稽天。滄溟爲之晦色。兵交刃接。鳥散魚驚。自卯及申。追奔逐北。斬首千餘級。轉戰三十里。激流膏而爲泉。似變長宏之血。委亂骸而擠壑。若泛鼉靈之屍。既而照盡高春。雲昏乙夜。賊乃收。

集餘衆。保據重巖。臣度彼遊魂。慮其宵遁。彼三軍齊進。四面合圍。二十三日。乘魚爛之危。啓地形之陣。揚  
歷誓衆。仗節訓兵。一鼓先登。賞必懸於芳餌。九攻失律。罪無赦於嚴誅。五部材雄。三河俠少。或生居燕地。  
尤工卽墨之圍。或家本秦人。早習昆明之戰。叱咤則江山搖蕩。慷慨則林壑飛騰。舉鵬力以揚威。耀犀渠  
而賈勇。澄氛除祲。同夏景之潰春冰。滅迹掃塵。若霜風之捲秋籜。戰踰百里。時歷三朝。前後生擒四千餘  
人。斬首五千餘級。柳諾設弄楊虔等。殞元行陣。懸首旌門。蒙儉和舍等。委衆奔馳。脫身銜險。雖復刑以止  
殺。丁壯咸伏於誅。夷禮不重傷。班白必存於寬宥。昔魏臣賦蜀。徒聞蒟醬之奇。漢使開邛。纔通竹杖之利。  
豈若膺紫泥而弔伐。指場徼以臨戎。一戰而孟獲已擒。再舉而哀牢授首。斯並皇威遠暢。廟算遐宣。奉玄  
猷以配天。徒知帝力。掩望輿而闡地。豈曰臣功。不勝慶快之至。謹奉露布以聞。

### 進千秋節金鏡錄表

唐張九齡

臣九齡言。伏見千秋節日。王公已下。悉以金寶鏡進獻。誠貴尚之尤也。臣愚以謂。明鏡所以鑑形者也。有  
妍蚩則見之於外。往事所以鑑心者也。有善惡則省之於內。故皇帝鏡銘云。以鏡自照。見形容。以人自照  
見吉凶。又古人云。前事之不遠。後事之元龜。元龜亦猶鏡也。伏惟開元神武。皇帝陛下。聖德之至。動與天  
合。本以全於道體。固不假於事鑑。然覆載廣大。無所不包。聖道冲虛。有來皆應。臣敢緣此義。謹於生辰節  
上事鑑十章。分爲五卷。名曰千秋金鏡錄。雖聞見褊淺。所擇不深。至於區區效愚。其庶乎萬一。不勝悃款

之至謹言。

玉海辭學指南

杜牧之曰。文以意爲主。氣爲輔。以辭采爲兵衛。

歐陽公曰。爲文有三多。看多。做多。商量多。

西山先生十二體所急者。制表記序箴銘贊頌而已。若詔誥則罕曾出題。檄露布又軍興方用。皆尙可緩。

語忌

鄧潤甫撰龍興節祝壽詞。用負黼辰。憑玉几。岑象求云。非所當用以祝壽。劉嗣明作皇子剃胎髮文。用克長克君之語。吏持以請曰。內中讀文書。最以語忌爲嫌。既剋長。又剋君。殆不可用也。嗣明亟易之。陳述古草明堂赦文。用奉祠紫宮。語犯俗嫌。陳去非草朱勝非起復制。用方宅大憂。言者以爲事涉人君。陳自明草右相制。用昆命元龜。倪正父謂人臣不當用。乞貼麻。又腦詞用故國之有世臣。雖有孟子出處。後來引用多。以爲不祥事。宜曰天生賢佐。國有世臣。便無瑕疵矣。詞臣草貴妃制。用釐降二字。侂冑制用聖之清。聖之和。皆犯公論。碁北海草吳玠制云。陸海神臯。既失秦川之利。銅梁劍閣。敢言蜀道之難。辛炳奏玠方屏翰四川。乃云既失秦川之利。乞改正。毋使遠方大將重以爲忌。遂改秦川爲秦中。德壽宮慶典。吳挺之客草賀表。有揚命二字。蘇熙之曰。導揚末命。此顧命中語。奈何用之。洪景盧紹興中作謝歷日表。一聯云。

宋浚儀王應麟伯厚甫編  
後學石門馬俊良嫌山摘抄

神祇祖考。既安樂于外廷。歲月日時。又明章於庶證。乾道中外。郡采取用之。洪曰。今光堯在德壽。所謂考者何哉。張文潛謝表。用我來自東。彭汝霖謂表用我字大無禮。洪景廬草葉顛制曰。無以我公歸兮。大慰瞻儀之望。本意用公歸之句。指邦人而言也。故云瞻儀。而單時疑之。謂人君而稱臣爲我公。楊文公於契丹。書用鄰壤交權。不免以字嫌。又嘗戒門人爲文。宜避俗語。旣而公作表云。德邁九皇。門人鄭戩曰。未審何時得賣生菜。公笑而易之。開禧用兵。詔諭天下。首聯云。匹夫無不報之仇。何其陋也。劉炳草嘉王制。用烝烝孝友之風。言者謂烝烝之語。何自而出。始誦書者。皆能知之。命辭立意。如是可乎。汪彥章草赦書云。八世祖宗之澤。豈汝能忘。一時社稷之憂。非予獲已。議者謂并道君數之。不應曰祖宗。信乎作文之難也。

陸士衡曰。謝朝華於已披。啓夕秀於未振。銘博約而溫潤。箴頓挫而清壯。頌優游以彬蔚。要辭約而理舉。故無取乎冗長。立片言以居要。乃一篇之警策。雖衆辭之有條。必待茲而效績。

文心雕龍曰。風骨乏采。則鷲集翰林。采乏風骨。則雉竄文囿。若藻耀而高翔。固文章鳴鳳也。銛冶經典之範。翔集子史之術。洞曉情變。曲昭文體。然能學甲新意。彫畫奇辭。才有天資。學謹始習。斲梓染絲。功在初化。器成采定。難可翻移。情者文之經。辭者理之緯。才爲盟主。學爲輔佐。善爲文者。富於萬篇。貧於一字。一字非少。相避爲難也。

尹師魯曰。文忌格弱字冗。

詩書須節一遍。以備四六之用。長句作一處節。

如乃心罔不在王室。學有緝熙於光明之類。

四字作一處。如迄用有成。熙帝之載之類。

兩字作

一處。如瞻者若時。燕及之類。

謝景思曰。四六全在編類古語。唐李義山有金鑰。宋景文有一字至十字對。司馬文正有金桴。王岐公最多。

制辭須用典重之語。仍須多用詩書中語言。及擇漢以前文字中典雅者用。若晉宋間語及詩中語不典

者不可用。

詩語雖不可用。亦有可用者。如杜詩特遣羣公表。制用羣公表。亦無害。

魏晉以來。文史中語。間有似經語者。亦可於制中用。但其間

名臣。非人共知者。不必稱引以爲故事。

如呂蒙、陸遜。固有盛名。終不必引。

後村劉公曰。四六家以書爲料。料少而徒恃才思。未免輕疎。料多而不善融化。流爲重濁。二者胥失之。

李公父欲應詞科。西山指竹夫人戲曰。試爲進封制。可乎。公父末聯云。保抱攜持。朕不安丙夜之枕。輾轉

反側。爾尙形四方之風。西山稱賞。

迂齋樓公曰。經句對經句。如在武丁時作召公考。惟汝一德。于今三年。天維顯思。民亦勞止。有能奮庸。爰

立作相。經營四方。飲御諸友之類。尙是天造地設。若萬人留田。對三事就緒。雖以史句對經句。緣有氣勞

所以不覺。

北海督府訓辭尤爲宏偉。有曰：盡長江表裏之封，悉歸經略。舉宿將王侯之貴，咸聽指揮。水心曰：荆公取經史語組織，有如自然。謂之典雅，自是後進相率效之。

西山先生曰：辭科之文，謂之古則不可，要之與時文亦不同。蓋十二體各有規式，曰制曰誥，是王言也。

貴乎典雅溫潤，用字不可深僻，造語不可尖新，制詞三處最要用工。一曰破題，要包盡題目，而不籠露。四首

句體貼。二曰敘新除處，欲其精當而忌語太繁。推原所爲之官，除授之意，用古事爲一聯，尤好。如莫侍郎步軍制，法黃帝之兵，九賴爲營之重，資漢人之技，莫如用步之強，最妙。

三曰戒辭於戲而下是也。用事欲其精切。須要古事，古語爲聯，切于本題，有丁寧告誡之意。三處乃一篇眼目，燈窗平日用工，先

理會此等三處，場屋亦然。三處占工既多，則他處不逮無害。如三處弱，則他有妙語無益。三處稱停適當，則一篇工夫，十

占其六七矣。考官去取，亦多以此較優劣，不可不知。至于具官某以下，謂之褒辭，文武宗戚皆可預備，則差易耳。若夫褒辭，則亦須切當。文武宗室各用得體，平時先

要準備。

周益公曰：韓退之，崔羣，戶部侍郎制。初云：地官之職，邦教是先。末云：選賢與能，于今惟重。擇才經賦，自古

尤難。凡命版曹，何嘗不主理財。惟退之先及邦教，而以經賦二字終之，深合經旨。

謝景思曰：開寶幸西京，詔曰：豆籩陳有楚之宜，黍稷奉惟馨之薦。不以籩豆有楚，對黍稷非馨。時人許具裁前，起句云：定鼎洛邑，我之西都。燔柴秦壇。

國之大事。

周益公擬加上尊號詔，其頌太上皇帝云：以德行仁，本性誠之固有。修文偃武，合經緯之自然。太上皇后



云月齊日以得天。而能久照。坤順乾而配地。是以廣生。上再三稽獎。謂數句用經語。該括明備。非卿不能爲真大手筆也。倪正父爲上壽。皇聖帝壽成皇后尊號詔云。率百官若帝之初。不講非常之禮。於萬年受天之祐。聿迎滋至之休。

代高麗王謝賜燕樂表

孫覲

十行賜札。誕彌遼海之邦。萬里同文。普聽均天之樂。起頭若如第二人。止說寵逮遠邦之說。則弱而無力。故用此大體。俯慚虛受。中積愧懷。伏念臣錫壤三韓。襲封四郡。環居島服。習聞夷靺之聲。仰睇雲門。實眩咸池之奏。

先說遠夷不足以知雅樂。而後敘作樂之盛。方重華之上治。躋累洽之閔休。監二代以敷文。命一夔而制樂。登歌下管。天地同流。鼓瑟吹笙。君臣相說。

此表警句。全用經句而復典麗。大凡詞科四六。須問有此一兩聯。則天地以同流。事亦與孫仲益同。但不合不全。故弱。此不善言。加賁鹿苹之饗。輔成魚藻之歡。有懷疏遯之臣。亦預分放之數。玉帛萬國。千舞遍格於七旬。簫韶九成。肉味遽忘於三月。仰止祝將之賜。鬱然食侑之光。驟此叨居。未安殆無前比。茲蓋伏遇皇帝陛下。躬持慈寶。丕冒仁天。通道八蠻。坐致遠人之悅。同符五帝。肇聞古樂之興。出大晟之珍藏。作朝鮮之榮觀。兜離一變。慈惠均歡。蕩蕩乎無能名。雖莫見宮墻之美。欣欣然有喜色。咸與聞管籥之音。稽首拜嘉。周邦來賀。臣敢不服膺容獎。謹度遐方。仰九門之句傳。徒起戴盆之望。與百獸而率舞。但深傾藿之心。此表辭意俱勝。可爲定格。

此表警句。全用經句而復典麗。大凡詞科四六。須問有此一兩聯。則天地以同流。事亦與孫仲益同。但不合不全。故弱。此不善言。加賁鹿苹之饗。輔成魚藻之歡。有懷疏遯之臣。亦預分放之數。玉帛萬國。千舞遍格於七旬。簫韶九成。肉味遽忘於三月。仰止祝將之賜。鬱然食侑之光。驟此叨居。安殆無前比。茲蓋伏遇皇帝陛下。躬持慈寶。丕冒仁天。通道八蠻。坐致遠人之悅。同符五帝。肇聞古樂之興。出大晟之珍藏。作朝鮮之榮觀。兜離一變。慈惠均歡。蕩蕩乎無能名。雖莫見宮墻之美。欣欣然有喜色。咸與聞管籥之音。稽首拜嘉。周邦來賀。臣敢不服膺容獎。謹度遐方。仰九門之句傳。徒起戴盆之望。與百獸而率舞。但深傾藿之心。

此表辭意俱勝。可爲定格。

代宰臣以下賀日有五色雲表

秦檜

秦檜

秦檜

秦檜

代宰臣以下賀日有五色雲表

秦檜

聖主當陽。庶窳際千齡之運。卿雲抱日。清臺占五色之祥。景曜觀瞻。歡均率溥。竊以仰模乾象。懋建國經。

君德無私。明有同於日照。臣職匪懈。勢有類於雲從。竊以下說君德臣職之意。極好。大凡祥瑞表。須如此推原。惟心合而益章。則效降

而靡忒。乃如今日。允謂昌期。如蓋如盤。方顯照臨之用。非煙非霧。共呈承載之華。諒非此道之默通。孰致

彼蒼之昭假。稽諸往諫。實未前聞。歷候躔離。但書於合璧。慶符震育。徒擬於圓車。當知上瑞之難全。必待

盛時而畢見。是爲常道。匪曰私親。伏惟皇帝陛下。揆道統天。膺時御極。體離明而燭物。需需澤以懷人。上

說日。下句說雲。極有工。輝光發衷。德又新而無敵。臣鄰效力。職布列而俱宜。休矣祥開。灼于旰食。臣等假寵惟舊。常

依日月之光。委質何功。偶際風雲之會。大凡題日中事。須是誓勤絲薄。永介昭明。如絲薄亦是雲。昭明亦是日。帝表長瞻。

尚已傾心於就望。官名久正。毋庸紀號於青黃。文苑英華慶雲抱日賦云。臣如雲。君如日。又黃雲捧日賦云。日者君之德。雲者臣之狀。彼無私以陛下。此竭誠而奉上。此表

命意。蓋本於此。

### 代守臣謝賜御書周易尚書表

湯思退

宸章帝藻。粲如琬琰之傳。神畫聖謨。較若天人之備。此表頭神畫聖謨。及天人之備。便見易與書之意。如此方切題。不可汎汎說御書經書也。啓函拜賜。

拭目知榮。竊以法始四營。莫辯乎易。文兼五典。皆聚此書。續東魯之章編。發先秦之竹簡。意廣大而孰測。

辭灑灑以莫窺。其在累朝。以爲古訓。故宣帝立梁邱之學。豈革荑茲之談。彼明皇親洪範之篇。徒改陂頗

之字。荑茲對陂。願亦上。未有留神乙夜。探蹟前經。刪妄論於九師。掇微言於四代。寫之縑帙。示於薦紳。體飛動於龍

鸞義昭回於星斗。月將日就彰聖學於祇勤。墨妙筆精。竦侯藩之瞻戴。懋乃非常之績。屬我中興之朝。恭惟皇帝陛下。識際道真。行高世表。垂衣裳而致治。蓋取乾坤廣視聽以御圖。一似堯禹。故此躬行之至。見乎心畫之間。蓋取乾坤。一似堯禹。上句說易。下句說書。與前表說雲說日之意合。而下則過之。教兼被於臣鄰。賜不殊於中外。祕書深刻。已參淳化之考經。方國咸頒。遠陋漢光之手札。固可用。不皆史尋親切事用之爲佳。臣叨分符竹。獲親寶奎。對未停妥。八法難如。徒驚端勁。逾偉之狀。一圻所治。願布精微。疏通之風。

表斷句須要有力。如洪景廬。但驚奎壁之輝。從天而下。莫測龜龍之祕。行地無疆。

羅疇老代高麗脩貢表。全篇皆穩。其間一聯云。地瀕日出。每輸傾藿之心。天闊露零。亦被蓼蕭之淨。二事人用之極熟。此聯稍變言語。遂爲佳句。大抵用事當如此。不然則汎濫雷同矣。其斷句云。矢來肅謹。用昭遠慕之誠。弓掛扶桑。永荷誕敷之德。亦好。

林虞謝脩都城記表。全篇皆好。但斷句無力。其中云天造地設。示根本於華夷。陽曜陰藏。壯規摹於今古。警句也。

一表中眼目全在破題。二十字須要見盡題目。又忌體貼太露。如前輩慶雲瑞粟野蠶成繭表。用參著兩儀之瑞。五色雀。瑞麥。瑞芝。用賭珍符於動植。便見三者分明。

安南國謝加恩并賜對衣金帶鞍轡表。用式兼名器之榮。蓋只用兩字。該盡題目。最可法也。貼題目處須

字字精確。且如進書表。實錄要見實錄。不可移於日歷。國史要見國史。不可移於玉牒。乃爲工也。進書一門。諸書體製各不同。玉牒乃紀大事之書。國史乃已成紀傳之書。實錄乃編年之書。實訓則分門日歷。則繫日會要。則會粹。各是一體。若出進玉牒表。須當純用玉牒事。不可以他事雜之。舉此一端。其餘皆然。若汎濫不切。可以移用。便不爲工矣。

大抵表文以簡潔精緻爲先。用事不要深僻。造語不可尖新。鋪敘不要繁冗。此表之大綱也。

表有賀有謝。經筵進讀進講。有進貢。有進書。其體頗不同。除單題易區處。有總數事爲一題者。破題須包盡。至於瑣碎工夫。尤爲繁多。且如出一賀冊表。非胸中有五六件冊寶。如何展布得一篇。又有不可測者。

如宣和間。順州進枸杞表。

燕北海作

固非場屋中出。萬一試日。或遇此題。平時不知枸杞爲何物。焉能作靈

根夜吠之語哉。須燈窗之暇。將可出之題。件件編類。如初學記。六帖。藝文類聚。太平御覽。冊府元龜等書。廣博搜覽。多爲之備。向年嘗見臨安進野蠶繭及絲綿紗絹。因謂同學者曰。萬一以此命題。中間將何鋪敘。皆相顧無語。其後擬一聯云。縷絲纖績。無慚禹貢之供。冰素方空。不數齊官之獻。絲繅紗絹四者皆全。須如此用工可也。

夷狄貢獻。須考證。今與中國通者幾國。且如安南國。日本閩婆。須考究在古爲何國。有何故事。可以引用。字面可以體貼。如安南則有南交浪泊。龍編銅柱之類。若非素備。寧免荒疎。須將歷代夷狄傳。本朝會要。

參考則得之矣。

代嗣高麗王修貢表。俱是先說襲封方及來王之意。惟第一人黃符先說本朝。首聯云。仰彼王靈。獲承基緒。敬修臣職。敢後要荒。羅崎曰。中國明昌。適際聖神之運。遠方奔走。宜修臣子之恭。雖不及嗣王之意。亦以首言中國。遂爲第二。

宣和取燕山。羣臣稱賀。令一館職作表。仍語以燕人悅則取之一句。不得單使其人搜經句。欲對不得。王初察曰。何不曰。昆夷維其喙矣。遂用之。

胡交修代謝賜御製御書夏祭神應記表曰。聖謨煥發。紀休應於柔祇。宸翰昭垂。霑龐恩於邇服。第二人便說御書不甚分明。

歐陽瓌謝賜御製宣德樓上梁文表曰。端門層觀。虹梁鬱起於中天。奎畫寶章。芝檢驟來於清禁。首聯雖見賜宰臣之意。而奎畫寶章芝檢。不無稠疊。矧是御製。不應用奎畫芝檢。此所以爲第三人也。又曰。相國王之考室。初無補於涓埃。仰虞帝之作歌。乃獲窺於黼黻。此聯却工。范同表曰。五門及葉。規模非萬戶之奢。肆筆縱橫。影琢鄙兩都之陋。

周益公代交趾進馴象表。首聯云。效牽靈囿。備法駕之前驅。已見象爲有用。又曰。名應周郊之五路。克協

馭儀。耳聞舜樂之八音。能參率舞。靡憚奔馳。幸捨鳶飛之跼跼。無煩教擾。卑踏獸樂之殷殷。曲盡馴象

生意。就試之上。僅能形容畫象及馴象。但不見馴服生動態。惟益公說出象之步趨。來庭之意。遂中首選。

華陽賀老人星見表曰。金行貫紱。顯氣肅乎西成。珠緯躔空。祥輝麗乎南極。乾文燁潤。霄景澄夷。又曰。薦人君之壽。既稽元命之圖。表天下之安。又載西京之志。一時慶語。無出其右。

謝景思曰。荆公在金陵。有中使傳宣撫問。并賜銀合茶藥。公作表云。信使恩言。有華原隰。寶奩珍劑。增賁邱園。五事見四句中。言約意盡。

攻媿樓公曰。順州得枸杞宿根於土中。綦北海屬聯曰。靈根夜吠。變異質於千年。駟騎朝馳。薦聖人之萬壽。眷荒裔沈藏之久。寶王師恢復之初。物豈無知。時如有待。表既進。天子爲之改容。

誠齋楊公曰。有用古人全語而雅馴妥帖如己出者。介甫賀册妃表云。關雎之求淑女。無險詖私謁之心。雞鳴之思賢妃。有警戒相成之道。

四六有作流麗語者。須典而不浮。汪彥章賀神降萬歲山表云。恍若壺天。金成宮闕。浩如玉海。虹貫山川。有作華潤語而重大者。最不多得。曾子固云。鈎陳太微星緯咸若。崑崙渤澥。濤波不驚。

起聯

東觀書林。久徠漢儀之觀。西崑策府。載瞻周馭之臨。東萊賀車駕幸祕書省。

皇治憲天。垂宏募於萬世。史編繫日。昭成法於一王。倪正父進壽皇日歷。

德茂重華。接璿源而詒燕。書嚴大典。續寶牒以垂鴻。進壽皇玉牒。

侍言虎觀。陳三聖之宏規。錫宴麟臺。講一時之盛禮。周益公謝讀三朝寶訓終篇宴賜。

聖皇至孝。荷神鑒之溥臨。清廟儲祥。挺靈華之秀發。說齋賀仁英室芝草。

上聖紹休。不衍洪圖之慶。元儲正位。茂膺顯冊之榮。陳正父賀皇太子受冊。

治繼三朝。不聞詒謀之懿。法垂萬世。聿嚴紀事之書。西山進三朝國史帝記。

聖神御極。廣推徧覆之仁。動植蒙休。共効太平之瑞。進五色菴瑞麥芝草圖。

聖而濟衆。親成垂世之經。予以馭臣。例及稱藩之國。李公彥代夏國謝賜聖濟經。

烈祖文孫。一本纘承之懿。皇支帝載。兩全筆削之功。王器之進三祖貽諸今上重修玉牒。

三后在天。軼鴻猷於今古。百王冠德。紀茂實於典謨。東萊進三朝國史。

規摹宏遠。更三聖以重光。憲度著明。參四書而並載。進慶元勅令格式。

惟皇上帝。將開與子之祥。有恤闕宮。肆歲尊謀之事。野處賀祠高禱。

舜歷在躬。大一人之聖孝。堯言布下。輯三紀之睿謨。東萊進述紹興詔旨。

投戈講藝。載信三代之風。肆筆成書。增賁七篇之訓。野處謝賜御書孟子。

九月授衣。駿發先庚之旨。百官承式。溥霑令甲之恩。同上謝冬衣。

親年有永。方齊箕翼之輝。聖孝無前。併上乾坤之策。賀太上皇帝后壽號冊寶禮成。

宸襟典學。稽上古之聖謨。帝幙疏恩。錫先儒之義贊。許若舒代講讀官。謝賜尚書正義。

鏤牒編年。並紀光華之旦。涓辰歲事。聿新曾閣之儀。傳於仁賀未安。王牒口歷。

明聖寅恭。寫作宸居之監。書言深潤。勒爲册府之珍。代宰臣進秘書省石刻。御書御製敬天圖。

御府分珍。煥切磋之文采。使輶臨賜。新指畫之威儀。龍溪謝賜。象簡。

皇天篤佑。忽垂象以示人。聖主靈承。乃側身而修行。亟銷變異。宜卽變儀。率籲庶工。仰干淵聽。星變請御。殿復膳。

保章瞻象。既除星祲之災。太僕詔王。盍正朝儀之位。龍溪星變請。御正殿。

### 竊以用事

真宗著清景之題。必言省費。仁祖述危竿之諭。蓋謹居高。周益公謝御。製損齋記。

德如堯帝。祝多子於封人。聖若文王。詠百男於詩雅。賀生皇。子。

世祖推恩。長安列六子之舍。明皇廣愛。華清建百孫之居。盤洲代郡王。謝賜第。

周有采薇之詩。因命率以衛中國。漢著大風之詠。期得士以守四方。初寮謝賜。御詩。

被阜以生。驗漢庭之熙洽。食糲而化。彰唐室之隆平。滕子濟賀野。蠶成繭。

漢文繼統。每惟代邸之優。唐帝嗣圖。尤軫路宮之念。魯可宗代常德。府謝賜府額。

姬姓作藩。未成人而賜履。漢宗受社。方在襍以錫封。元章簡代。皇子謝。



堯言布下猶資五典之傳漢制恤人尚賴六經之續進續修寬  
恤詔令

永平神爵之頌孝明稱美者五人正元重九之篇德宗考第於三等晏元獻  
進詩

笙鏞列於舜陛無相奪倫管磬設於周庭既備乃奏初寮賀燕  
樂成

與史册以並驅唐有嘉名之創煥文風而可述漢稱洪業之遵陳益父賀奉安  
玉牒御集

犀來徼外表章帝之重熙雉貢越常慕成王之極治周益公交  
趾進象

擁篲迎門漢祖悟櫟陽之敬望樓執鞚唐宗羞興慶之歡王卮唯志於夸毗寶册不忘於授受奮乎百世

在我一時野處賀加太  
上尊號

頌采羽於漢賢盛述威懷之應紀來牟於周雅備陳率育之休惟效異之靈華亦騰歌於樂府莫冲五色雀  
瑞麥芝草圖

天錫嘉符芝稱珍物俯延英之御座爰興唐帝之詩生甘泉之齋房嘗下漢皇之詔說齋賀仁宗英宗室  
前柱上生芝草

推原

烏本陽精鵠知歲事方聖祚紹隆於火德適天時應在於金穰龍溪賀赤  
烏白鵠

極儒者之榮獨高翰墨之選鼓天下之動莫如號令之孚矧參基命之承尤峻禁林之望王岐公謝翰林  
學士承旨

皇祖有訓嘉言孔彰開創守持垂億萬年之基業都兪吁咈振六十載之綱條皆聚此書克昌厥後周益  
公讚

三朝寶訓  
終篇

鋪敘形容

重陰益固。應水澤腹堅之時。積潤潛通。迎土膏脉起之候。常哀賀

有璞於此。必使琢。恍驚制作之工。匪伊垂之則有餘。允謂便藩之賜。洪景嚴謝

鳳生而五色。恨丹穴之已遙。龍藏乎九淵。驚驪珠之忽得。呂吉父謝賜

帝暉下矚。光榮河温洛之藏。天藻昭垂。跨過沛橫汾之詠。東萊賀事

金英並秀。絢藻井以煌煌。紫蒂駢分。映棠階而萼萼。北海賀

如玉韞石。虹氣隱乎山川。及雲升天。龍澤沛乎宇宙。南塘賀

函封遠致。不知何國之白環。篆刻孔章。咸曰寧王之大寶。同上賀

太極班朝。肅廷紳而咸會。少陽在列。粲卷服之彰施。洋洋軌範之言。奕奕瓊瑤之刻。温文有恪。陟降欽承。

將以鼓鍾。對峙黃麾之仗。授之璽紱。交輝青輅之旂。小侯邦備物之彝。陋王社初封之誥。陳正父賀皇

品羅羣帙。岳峙大庭。粲然物采之新。將以鼓鐘之奏。徹覽觀於宸極。重尊閣於禁嚴。典籍聿崇。小廣內承。

明之秘。圖書畢出。會榮河温洛之祥。陳征父賀奉安玉

適華編之初。徹叨異渥之沓來。輝映宮螭。特煥寶奩之飾。歡均苹鹿。例陪綺席之光。文韜名駿之鮮明。濃

麝龍團之芬郁。夸鄭澣析經之賜。侈桓榮稽古之榮。輒陳歸美之章。不展逢時之慶。詩哀百詠。傲麗正之

廣酬句寫七言。埒栢梁之聯屬。徐子儀代經筵讀孝宗聖政終篇謝宴賜進詩。

編簡旁羅。尙想古文於藏壁。金絲迭奏。如聆雅韻於升堂。傳景仁講尙書謝宴。

樂皦韶英之奏。儀修卉甫之容。甘醴薦令芳。秩彌文於主鬯。吉日告爾字。申嚴訓於臨軒。賀皇子冠禮。

銀潢滉漾。玉版闕嚴。千八百國之封。先乎異姓。五三六經之籍。展也同符。東萊賀進類譜玉牒。

二后受之。同歸于治。萬物備矣。皆聚此書。萃圭璧於綠文。會日星於漆簡。進寶訓。

旌旗燭耀於洪河。金鼓震驚於靈嶽。介邱霧息。已望翠華之來。沂水更生。更起舞雩之詠。柳子厚賀破東平。

東臺瑞物。冠玉璽之珍符。左戶輿圖。增金城之列障。呂吉甫賀元會。

璿題灑落。煥東壁之星躔。藻衛森羅。備甘泉之法駕。奉雕輿而降格。被王座以安安。呂希純賀景靈宮奉安御容禮成。

公孫數萬之詭辭。披圖可見。虞初九百之小說。開卷盡知。豈伊龍閣之珍藏。乃作雞林之秘寶。葛勝仲代高麗謝賜覽。

太平御覽。

龍盤虎伏。瞻王氣以雲屯。螭首龜趺。據坤靈而山立。林虞謝賜都城記。

用事形容

名臣畢萃。踵劉珍建武之規。異域旁該。掩德裕會昌之作。李嶽進四朝列傳。

肇易編年。昭合馬遷之纂次。苦爲考紀。更逾班固之鋪張。西山進帝紀。

遠循繭俗。先九月以授衣。俯陋漢儀。因立春而賜帛。

謝賜冬衣。

徊翔有煒。協周家王屋之符。粹美而珍。異莊子彫陵之見。

龍溪賀亦鳥白鷓。

効貢毫都。上掩太宗之迹。倂圖蜀郡。益增仁祖之光。

說齋代臨安府進瑞麥。

### 末聯

撮其機要。誠堯典十萬之言。奉以周旋。取武成二三之策。

姜凱謝賜尙書正義。

率羣卿洎宗臣。俯陋唐室之制。令史官宣景耀。願陳漢頌之辭。

賀皇太后上尊號。

謹文王安否之問。敢怠帥行。書唐宗仁孝之詩。仰祈札賜。

攻媿代皇太子謝冊命。

既與在庭之多士。同值文興。將令就傅之百男。悉從隗始。

龍溪代嘉王謝及第。

寶五典之書而爲訓。獲舉宏綱。舉三宗之事以戒王。願碑末議。

西山進三朝帝紀。

紀周宣舞鎬之年。外攘復古。按韓愈辨徐之說。不戰來戎。

初察賀白兔。

動鼓鐘於長樂。何慙漢家爲壽之儀。響環佩於後宮。更邁唐室奉觴之禮。

周益公賀太上皇后生辰。

視淮南之書。豈但矜誇於下國。聽山東之詔。固當裨助於中興。

同上謝翰林學士。

聽漢詔於山東。少補中興之治。布堯言於天下。庶無內相之慙。

同上。

事做石渠。稱制仰勤於臨決。才非山甫。有司終愧於哲明。

攻媿進吏部去。

讀列聖之錄，諒思風烈之如存。上庶事之歌，所冀明良之交勅。徐子儀讀聖友終篇進詩。

惟禮可以爲國，願廣晏嬰之言。非道不敢陳前，竊效孟軻之敬。西山謝禮部侍郎。

賜宮錦而嘉草詔之能，雖非敢望。卽金鏡而擲任賢之要，知所自期。謝翰林學士。

舜裳五色，慚微裨補之長。燕駿千金，願廣招徠之意。謝衣帶鞍馬。

書大事而小則簡牘，願殫細素之勤。藏名山而副在京師，終冀汗青之望。野處進三朝帝紀。

鼎鼐養賢，省己難勝於異數。樽酒納約，愛君期盡於愚衷。西山謝講易終篇賜宴。

願借髦士，稱械樸之能。官人載詠詩章，思采繁之不失職。倪正文代進士謝賜射推賞。

君已知言，熒惑坐移於三舍。臣當守職，秦階願獻於六符。龍溪代宰臣星變謝放罪。

鄭衣又改爲兮，莫副尙賢之目。禹黻無間然矣，永肩歸美之誠。謝春衣。

使忠臣得盡其心，敬忘周詩實篚之意。如羣生有以自樂，願推漢詔賜帛之仁。

繼中興聖統之編，式符瑞應。陋皇室維城之錄，未究編摩。進玉牒。

修長樂之注，已觀景耀之宣。誦思齊之詩，更修徽音之嗣。原闕。

宋四六摘句

居域中而大者四，庶兼形高厚之功。王天下而樂者三，冀長奉庭闈之養。周必大德壽宮上太上皇后尊號箋。

鍊石而補皇天。不愧女媧之巧。得道而坐少廣。莫知王母之年。靈弓戢矢。早知武王十亂之功。含飴弄孫。行應堯帝多男之祝。周必大賀皇太后八十箋。

呼萬歲者三。歡騰朝野。等百世而上。福衍子孫。文天祥壽崇節賀皇太后箋。

念終始典于學。於緝熙殫厥心。司馬光進稽古編表。

薰絃播奏。散爲花下之風。蒼玉雕鐫。秘作升中之典。王禹偁謝免和御製元日除夜詩表。

念官師所以卒歲。恐天下有受其寒。爛然晝鮮。煦若春至。和氣暢肢。顧折膠而何畏。大恩壓已。憂稱

服以爲難。宋祁謝衣襖表。

唯疾之憂。每上煩於君父。不能者止。晚得請於朝廷。許佩寵榮。歸掃松楸之壟。庶緣蕭散。得全蒲柳之

年。扶衰遠去。豈尊鱸適爲于秋風。銜戀何言。冀狗馬未先于朝露。注藻代劉相謝給展省先塋表。

韞而藏諸匱。賈逾褒袞之榮。束以立於朝。敢替書紳之戒。應松湖代謝玉帶表。

白鳥九子。天矜反哺之情。丹鳳十行。雨施流根之澤。謂能仕而教之忠。子承父訓。故率親則等而上。人

欲天從。而臣月雲爲家。漁樵爭席。三春寸草。莫報青陽之暉。億載萬年。永祈黃屋之壽。楊萬里謝以舅長孺官係升朝該遇郊祀大禮

封敘通奉大夫表。

雖帝念更生。不使身罹于災異。然人譏周勃。罔知職在于陰陽。君已知言。榮惑坐移于三舍。臣當守職。

泰階願獻于六符。汪藻謝放罪表。

馬援謗深，誰與辨明於蕙實。羲之誓苦，但期終老於蘭亭。念父母之于厥子，惟疾痛之爲憂。而天地之

于羣生，俾飛潛之各遂。甘山林之寂寞，一洗五十七年之非。憑香火之因緣，上祝億千萬歲之壽。李綱謝免

湖南路安撫大使兼知潭州依舊宮祠表。

祿足以代其耕，遂免啼饑之患。食焉而怠其事，難逃尸素之譏。友麋鹿，侶魚蝦，自適優游之願。先狗馬，

填溝壑，敢忘報效之恩。鄭丙謝宮祠表。

陳力就列，不能者止。投閑置散，乃分之宜。燭青藜而談古，豈復與英俊游。立白茅而祝釐，尙長使聖人

壽。楊萬里辭免贛州得祠進職謝表。

雷霆所擊，寧忘失箸之憂。日月有明，忽照覆盆之下。人謂去珠之再得，自憐墮甑之猶全。半九十里，

深嗟末路之難，取三百廩，徒切素餐之媿。樓綸謝宮觀表。

寵榮既溢，其涯憂患亦隨而至。况今時不乏士，物咸遂生。鳧雁去來，固不爲於多少。鳶魚上下，皆自適

於飛潛。俾其解組宮庭，還車故里。披裘散髮，逍遙垂盡之年。鑿井畊田，歌詠太平之樂。歐陽修蔡州再乞致仕第二表。

羣材方茂，蒲柳未秋。而先衰衆駿並馳，驚駘中道而先乏。風波憂畏而慮已深，疾病侵凌而老亦至。

口日誦于田間，身坐貪于祿利。可畏至公之議，何施有覲之顏。歐陽修蔡州再乞致仕第三表。

伏况微臣本無宿疾。偶值醫者用術乖方。殊不知脈候有虛實。陰陽有逆順。診察有標本。治療有先後。妄投湯藥。率任情意。差之指下。禍延四肢。寢成風痺。遂難行步。非祇憚炎盪之苦。又將虞心腹之變。勢已及此。爲之奈何。雖然一身之微。固未足卹。其如九族之託。良以爲憂。呂誨奏乞致仕表。

豈唯老馬之罔棄。復許見犀而後行。雖臥野水白鷗之岸。未離春風玉筍之班。大隱而乃隱於朝廷。在外而如在于王室。楊萬里謝致仕轉通議大夫除寶文閣待制表。

安徽巡撫臣朱珪跪奏爲恭謝天恩事。乾隆五十九年四月二十九日。內閣奉上諭。朱珪進御製論史古文。閱其後跋。以朕論史之文。納繹推闡。有因史成經。紹六爲七之語。但朕自臨御以來。宵旰勤求。幾餘典學。凡史冊內有關政治者。偶經論斷。爲之折衷。而見諸設施者。方且引以爲愧。朱珪跋語。固非鋪張揚厲。泛爲諛辭。究屬稱頌過當。第觀其文義。尙爲典核。著賞給紗扇筆墨等件。以示獎勵。此冊並著諸皇子及皇孫綿恩各繕一部。預備陳設。欽此。五月十一日。臣賡摺差官捧到恩賞臣庫紗二端。葛紗二端。扇二匣。香二匣。筆二匣。墨二匣。臣隨出郊跪迎。至署。恭設香案。望闕叩頭。祇領訖。臣竊惟典謨出紀言之筆。以堯舜而進爲經。春秋刪載事之書。雖遊夏而窮於贊。龍門以下。遂少折衷。虎觀之談。更多同異。臣幸得探源御集。景臬聖謨。台正別史。而成鉅觀。綜大小言。而歸定案。光中鏡照。由百世等百王。井底管窺。書萬紙誦。



萬遍。方愧童蒙之喻日。忽聞寵賁之自天。頒錫逾優。導揚益拙。欽惟我皇上。單心典學。運掌數猷。啓成參  
治理之原。發篋洞古今之會。識大識小。皆良史述者。謂明立德立功。非空言措之爲政。陳二十四編之炯  
鑑。經神更賈寶書。證五十九載之純勤。史論獨詮心學。其義則取天人。決於皇綸。先行而從左右。蒼爲帝  
範。臣曾遊東觀。慙薰班馬之香。欣遵中天。上揭雲龍之紀。萬幾有暇。釐治忽於堯心。小物不遺。燭神姦於  
禹鼎。聖不自聖。經綸方懋於天行。醇乎其醇。論著爲章於漢倬。伏念編摩有志。何能析義麟經。翼注無知。  
亦欲矢音鳳竹。乃荷絲言下逮。益著淵冲。更聞玉冊分書。式昭法守。此誠億載寰中之福。尤極小臣望外  
之榮。惠出上方。輝分下土。冰絲却暑。依帝澤而生涼。風葛搖輕。被天恩而增重。積歲鸞坡之夢。潤灑飛花。  
駢行龍輔之賓。暗呵研露。金爐添馥。隔重霄而尙染御香。瑞筵來薰。率八郡而共揚仁扇。臣業疎鑽仰。詞  
竭廣颺。學海徒驚。呼嵩倍切。向輯經林。鉅製已沐崇褒。今繙史聖全編。再膺渥澤。從此簪毫吮筆。莫罄九  
重著錄之多。銘佩書紳。長欣四表光華之被。所有臣感激榮忭下忱。謹繕摺恭謝天恩。伏祈皇上睿鑒。謹  
奏。

安徽巡撫臣朱珪跪奏。爲恭謝天恩事。乾隆五十八年十二月二十一日。准辦理軍機處封寄到乾隆五  
十八年十二月初十日內閣奉上諭。昨安徽巡撫朱珪進御製說經古文。閱其後跋。以朕說經之文。刊千  
古相承之誤。宣羣經未傳之蘊。斷千秋未定之案。開諸儒未解之惑。頌皆過當。但歷舉朕敬天法祖勤政

愛民各大端。見諸設施者。與平日闡發經義。實有符合。語皆紀實。並非泛爲諛詞。夫六經爲治世之書。內聖外王之道。無不賅備。若止尋章摘句。僅能得其糟粕。無由探索精微。即使窺見義蘊。垂諸著述。不能躬體力行。亦屬空言無補。朕臨御以來。勵精圖治。維日孜孜。幾餘典學。于詩書六藝之文。偶有闡發。俱與政治相關。卽義疏相承。舛訛未正者。爲之折衷定論。亦有裨于世道人心。凡平日出治之要。皆可與說經之言相印證。蓋發爲文章者。皆應見諸政事。我世世子孫。果能善繼善述。欽承法守。學于古訓。見諸躬行。以朕之心爲心。以朕之政爲政。則是我國家億萬年無疆之庥。朕于茲有厚望焉。此冊著諸皇子及皇孫綿恩各繕寫一部。並將此旨冠于簡端。將頒設諸處。以垂久遠。至朱珪于御製古文。紬繹推闡。能見其大。跋語尤得體要。殊屬可嘉。著賞給筆墨等件。以示獎勵。欽此。並臣賚摺差官。捧到恩賞。臣筆兩匣。墨兩匣。大荷包一對。小荷包五個。金八寶一分。金錢四枚。金錠四枚。臣隨出郊跪迎。至署。恭設香案。望闕叩頭。祇領訖。臣跪釋恩言。榮肇殊錫。感深莫措。寵極真驚。伏念臣學陋蟲雕。識微蠡測。何足繪摹天日。颺贊高深。欽惟我皇上文學緝熙。堯章巍煥。百四十四篇之經訓。日月光懸。八千大千世之心傳。孔姬道貫。作而善述。合文思勳業于一人。君實兼師。示心學躬行于萬禩。臣悅中誠服。熟讀深維。雖尊聖而莫贊一辭。擬觀經之願書萬本。綴尺松于部婁。詎益泰山。挹杯水于望洋。難探環海。何知天大。亦許管窺。弁以皇綸。發無疆之精奧。垂爲家學。寫有典之楷模。獎勵優加。便蕃特賚。燦五花于象管。蒼顯霏珠。潤甘笏之隄糜。墨雲涌

璧金盤千縷。匪伊垂之帶有餘。寶萃八琛。維其時矣。多且旨。佩當心而如意。采纈五雲。鑄保定而宜春。錢珍萬選。惟金三品。妙製丹車。銀甕之祥。作服五章。實分藻火山龍之飾。臣業荒蠹簡。敢誇稽古之榮。恩重龍光。竟荷如天之福。惟有體聖言而宣上澤。勤敷實意于一方。庶期保皇極而勵臣衷。長仰蕃釐于萬歲。所有臣感激榮忭下忱。謹繕摺恭謝天恩。伏祈皇上睿鑒。謹奏。

安徽巡撫臣朱珪跪奏。爲恭謝天恩事。乾隆五十八年正月初一日。臣遞摺差官回省。賚捧到恩賞臣玉如意一枝。貂皮褂一件。臣謹出郊跪迎。至署。恭設香案。望闕叩頭。祇領拜服。訖。欽惟我皇上保定九如。悼庸五德。光華佛篆。湧寶意於金輪。繪繡堯章。揚錦衣於玉藻。紫閣紀十全之烈。輯瑞從心。翠雲臨萬國之朝。振裘挈領。舜球在握。指揮開葱嶺之山。禹服同珍。皮織貢渠搜之國。乃荷非常顏色。寵藉儒臣。何期好賜功良。榮傳疆吏。頒來天府。正迎元日之禧。春盎江城。恰映豐年之雪。巷衢豔羨。僚窳欣觀。舞以揚休。拜手惟祝。天恆健服。而見美章。身則抱日知暄。臣學陋蟲雕。稱慙鶴翼。賁分香案。柄談忝張敞之儀。豐蔚春袍。英粲飾齊嬰之儉。伏願天意長如人意。庶喜起於萬壽。萬年。賜衣更頌宵衣。調燠寒於四和。四極。所有臣榮幸歡忭。感激舞蹈下忱。謹繕摺恭謝天恩。伏乞皇上睿鑑。謹奏。

謝賜御筆熱河考並御識墨刻一卷摺

阮元

欽惟我皇上學海探源。地符開遠。德誠法祖。那居駐灑水之陽。功在信天。拓地極崑山以外。道元標夫鍾。

石未登齊老之峯。茅溝會於湯泉。僅見蒲昌之海。昔著考而濡流已判。今加識而河曲愈明。臣伏思濡水久訛。河源彌遠。舜禹之世。略在西荒。漢唐以來。陷於絕國。惟我皇上。削平四部落。休養卅餘年。金河百道。何異山莊武列之川。禹貢一篇。未及御製河源之考。蓋能通二萬里未通之也。故得決四千年未決之疑。且以漢使之行。久羈西域。明脩之志。徒守南音。持節者未必身親。操筆者徒知耳食。豈如今一介之使。逕達真源。九譯之言。胥歸聰聽。此又因武德之無遠弗届。故拓地而及天池。文學之無所不精。故審音而刊元史。紀略既修。以後字內雖有專書。熱河作者在前。卷中必須題識。貞珉繼勒。初分筆彩於華箋。翠帙頻頒。更仰恩光於墨寶。

謝賜御筆筆誤識過墨刻一卷摺

阮元

欽惟我皇上。典考唐虞。道積今古。萬幾咸理。事皆親御。丹篆半字。偶殊。文乃特鑄翠墨。昔知過以著論。聖人之言。已滿堂。茲識過以摛辭。周武之銘。仍在筆。臣竊思天行至健。有過度之餘。差地關无疆。見殊途之歸轍。見爲誤實爲無誤之驗。識爲過豈有或過之時。况乎考道德於百王。時以積而成古。聚典謨於千古。事因積乃可稽。稽之訓同。見堯典康成之註。積之爲義。詳荀卿勸學之篇。因異而轉。以見同。是二而還知爲一。辭文旨遠。知聖論之無不包容。氣盛理明。讀奎章而彌深悅服。

謝賜御筆兵部奏凱兵丁各歸營伍及福康安奏西藏善後事宜詩墨刻共

二卷摺

阮元

欽惟我皇上。健本自強。機由親握。我戰則克。七勝題圖。好謀而成。十全作記。中樞決策。將將兼以將兵。後藏詰戎。歸降繼以歸順。虎符銅節。權不寄於本兵。銀幣金瓶。事皆秉於駐藏。故調發如身之使臂。而經畫若網之在綱。是皆稟乾行不息之精神。遂長立史冊未聞之功業。夜未央而秉燭。屢問封章。日已昃而傳餐。更抒宸翰。司馬循驛傳之職。紀其事者五百言。回疆同善後之宜。廣其製爲四十韻。臣曾瞻丹筆。復賜翠珉。額頌知恩。深被墨雲之澤。弄藏惟謹。常承御氣之垂。



存 文 古 東

輯 喜 正 金

本館據天壤閣叢  
書本排印初編各  
叢書僅有此本

東古文存一卷。朝鮮兵曹參判金正喜輯。錄海東古文。起漢訖隋。凡書、令、表、詔、羣臣上言。爲十三首。正喜當道光朝。嘗入使中國。手書以貽漢陽葉東卿兵部志詵。元本輾轉歸會稽趙撫叔大令之謙。同治辛未。大令錄副以贈家兄懿棨。因得寓目。內貽漢將書。當光武建武四年。遣使朝魏上表。當孝文延興二年。及梁高祖册百濟武寧王詔。皆後漢書南北史所未載。昔在年都。遇東使詢之。知正喜早歿。此十三首亦止有寫本。且言東國刻書。必須公令照準。始克舉事。不得私自擅行。此雖官家古文。亦從無刻本流傳。因念此寥寥數十百名字。是海外古文之僅存者。迺爲錄陳光大三年時。新羅眞興太王巡狩管境碑一首。按次補入。文字顯晦。今古靡常。他年東國人來求書。得此。當知漢地廣大。無不容盛也。光緒己卯十月。福山王懿棨記。





# 東古文存

目錄

漢

讓高句麗琉璃明王書

貽漢將書

漢將報書

下令

下令

下令

下令

魏

遣使朝魏上表

魏孝文帝答詔

又詔

扶餘王帶素

高句麗大武神王

新羅婆娑王

新羅婆娑王

高句麗新大王

高句麗故國川王

百濟蓋鹵王

梁

羣臣上言

梁高祖冊百濟武寧王詔

陳補

巡狩管境碑

隋

諫獵書

新羅智證王時

新羅眞興太王

金后稷

# 東古文存

漢

讓高句麗琉璃明王書

新莽始建國元年

扶餘王帶素

我先王與先君東明王相好。而誘我臣逃至此。欲完聚以成國家。夫國有大小。人有長幼。以小事大者禮也。以幼事長者順也。今王若能以禮順事我。則天必佑之。國祚永終。不然。則欲保其社稷難矣。

貽漢將書

後漢光武建武四年

高句麗大武神王

寡人愚昧。獲罪於上國。致令將軍帥百萬之軍。暴露弊境。無以將厚意。輒用薄物致供於左右。

漢將報書

我皇帝不以臣驚下。令出師問大王之罪。及境踰旬。未得要領。今聞來旨。言順且恭。敢不藉口以報皇帝。

下令

後漢章帝建初七年

新羅婆娑王

今倉廩空匱。戎器頑鈍。儻有水旱之災。邊鄙之警。其何以禦之。宜令有司勸農桑。練兵革。以備不虞。

下令

後漢章帝章和元年

新羅婆娑王

朕以不德。有此國家。西鄰百濟。南接加耶。德不能綏。威不足畏。宜繕葺城壘。以待侵軼。

下令

後漢桓帝延嘉九年

高句麗新大王

寡人生忝王親。本非君德。向屬友于之政。頗乖貽厥之謨。畏害難安。離羣遠遯。泊聞凶訃。但極哀摧。豈謂百姓樂推。羣公勸進。謬以眇末。據于崇高。不敢遑寧。如涉淵海。宜推恩而及遠。遂與衆而自新。可大赦國內。

下令

後漢獻帝初平二年

高句麗故國川王

近者官以寵授。位非德進。毒流百姓。動我王家。此寡人不明所致也。令汝四部各舉賢良在下者。

魏

遣使朝魏上表

魏孝文延興二年

百濟蓋鹵王

臣立國東極。豺狼隔路。雖世承靈化。莫由奉藩。瞻望雲闕。馳情罔極。涼風微應。伏惟皇帝陛下。協和天休。不勝係仰之情。謹遣私署冠軍將軍。駙馬都尉。弗斯侯。長史。餘禮。龍驤將軍。帶方太守。司馬。張茂等。投舫波阻。搜徑玄津。託命自然之運。遣進萬一之誠。冀神祇垂威。皇靈洪覆。克達天庭。宣暢臣志。雖旦聞夕沒。永無餘恨。臣與高句麗。源出扶餘。先世之時。篤崇舊款。其祖。劍。輕廢鄰好。親率士衆。凌踐臣境。臣祖。須。整旅電邁。應機馳擊。矢石暫交。梟斬劍首。自爾已來。莫敢南顧。自馮氏數終。餘燼奔竄。醜類漸盛。遂見凌逼。構怨連禍。三十餘載。財殫力竭。轉自屏蹶。若天慈曲矜。遠及無外。速遣一將。來救臣國。當奉送鄙女。執箒後宮。并送子弟。牧圉外廐。尺壤匹夫。不敢自有。今璉有罪。國自魚肉。大臣彊族。戮殺無已。罪盈惡積。民庶崩離。是滅之期。假手之秋也。且馬族士馬。有鳥畜之戀。樂浪諸郡。懷首邱之心。天威一舉。有征無戰。臣雖不敏。志効畢力。當率所統。承風響應。且高句麗不義。逆詐非一。外慕隗囂。藩卑之辭。內懷凶禍。豕突之行。或南通劉氏。或北約蠕蠕。共相唇齒。謀凌王略。昔唐堯至聖。致罰丹水。孟嘗稱仁。不捨塗詈。涓流之水。宜早壅塞。今若不取。將貽後悔。去庚辰年後。臣西界小石山。北國海中。見屍十餘。并得衣器鞍勒。視之非高句麗之物。後聞乃是王人。來降臣國。長蛇隔路。以沈于海。雖未委當。深懷憤恚。昔宋戮申舟。楚莊徒跣。鶴撮放鳩。信陵不食。克敵立名。美隆無已。夫以區區偏鄙。猶慕萬代之信。況陛下合氣天地。勢傾山海。豈令小豎跨寒天達。今上所得鞍一以實驗。

魏孝文帝答詔

得表聞之無恙甚善。卿在東隅處五服之外，不遠山海，歸誠魏闕，欣嘉至意，用戢于懷。朕承萬世之業，君臨四海，統御羣生，今宇內清一，八表歸義，襁負而至者不可稱數，風俗之和，士馬之盛，皆餘禮等親所聞見。卿與高句麗不穆，屢致凌犯，苟能順義，守之以仁，亦何憂於寇讎也。前所遣使浮海以撫荒外之國，從來積年，往而不返，存亡達否，未能審悉。卿所送鞍，比校舊乘，非中國之物，不可以疑似之事，以生必然之過，經略權要以具別旨。

又詔

知高句麗阻疆侵軼，卿上修先君之舊怨，棄息民之大德，兵交累載，難結荒邊，使兼申胥之誠，國有楚越之急，乃應展義扶微，乘機電舉，但以高句麗稱藩先朝，供職日久，於彼雖有自昔之釁，於國未有犯令之愆。卿使命始通，便求致伐，尋討事會，理亦未周，故往年遣禮等至平壤，欲驗其由狀，然高句麗奏請頻煩，辭理俱詣，行人不能抑其請，司法無以成其責，故聽其所啓，詔禮等還。若今復違旨，則過咎益露，後雖自陳，無所逃罪。然後興師討之，於義爲得，九夷之國，世居海外，道暢則奉藩，惠戢則保境，故羈縻著於前典，楛賁曠於歲時，卿備陳疆弱之形，具列往代之迹，俗殊事異，擬況乖衷，洪規大略，其致猶在。今中夏平一，宇內無虞，每欲陵威東極，懸旌域表，拯荒黎於偏方，舒皇風於遠服，良由高句麗卽敍，未及卜征，今若不從詔旨，則卿之來謀，載協朕意，元戎啓行，將不云遠，便可豫率同輿，具以待事，時遣報使，速究彼情，師舉

之日。卿爲鄉導之首。大捷之後。又受元功之賞。不亦善乎。所獻錦布海物。雖不悉達。明卿至心。今賜雜物如別。

## 梁

羣臣上言

梁高祖天監二年

新羅智證王時

始祖創業已來。國名未定。或稱斯羅。或稱斯盧。或言新羅。臣等以爲新者德業日新。羅者網羅四方之義。則其爲國號宜矣。又觀自古有國家者。皆稱帝稱王。自我始祖立國。至今二十二世。但稱方言。未正尊號。今羣臣一意謹上尊號新羅國王。

梁高祖冊百濟武寧王詔

普通二年

行都督百濟諸軍事鎮東大將軍百濟王餘隆。守藩海外。遠修貢職。迺誠款到。朕有嘉焉。宜率舊章。授茲榮命。可使持節都督百濟諸軍事寧東大將軍。

巡狩管境碑補

陳光大三年

新羅眞興太王





